



C40-4514

丁翁上座請大齋及有
家書置之杭州紫雲山
我微笑塔晚夏府中永
為學者不敢許出院內
當山二世鐵牛機謹識



B 64853

破山禪師語錄序

大江以南自天童密雲老和上建立大法幢以來墮
地獅兒擺壞韁鎖自在游行者風馳電逐輩出爭光
回視明代萬曆初年前早已另闢一佛法乾坤眼底
祖道全彰活現滄桑世界當破山和上向金粟擔取
衣鉢時尚是金牛五丁新開蜀道景象而不慧之乘
月邊槎上支機石者固已久鑿混沌矣和上號從破
頭山得地而號名仍初薙染際派而名以志原原本
本也已已逮壬申間東塔一番鑪鞴憶得落草盤桓
甫畢千日之期旋應銅梁張大金吾之請自此而嵒

岳大峨遙歸故鄉之錦萬峯中慶坐展曹溪之具而
鳳山棲靈而祥符無際而蟠龍佛恩自浙還蜀歷癸
酉迄壬午九建刹竿集檀信之扳依膺

蜀王之隆供龍象與嶠月齊輝棒喝與曹源俱振是
謂花開檣李果熟蠶叢五葉西來一枝西去滴滴臨
濟之幹孫奕奕天童之肖子矣亡何而十方虛空悉
皆銷殞亡何而刀割香塗了無一二從上佛法中無
義語翻作世法中實事會當甲申蜀變以來胡現漢
現白刃春風在和上分中七嬰險難只當一頓家常
茶飯耳金城卓杖引領再來庶幾婆心切衆垂手爲
人復見一番威音王那畔作畧丈雪醉上座之間關
跋涉而至冷灰豆爆其先聲也東西法會語錄合十
二卷眼筋舌骨喝月擎雲絕無半點文字語言氣息
蓋代超羣實爲希有而醉上座感激法乳淵源珍惜
佛祖慧命受天童埽塔之重寄閱嶺關河洛之長途
抵茲吳越了大機緣昔之掇拾壽梓於蜀之梁山萬
峯者今且奉持重梓於禾之白苧新菴萬里飄風三
冬立雪滴水滴凍成始成終醉上座其人也而新菴
靜主清白常公無忘東塔典客親侍勝因殫力將事
可謂同心同德更得起伯孫居士以夙契面承倡緣

畢願從此紫柏院中側理輕編又放一層寶光矣世出世間紙墨生涯疊床充棟未免被剞劂氏笑人獨此入泥入水無邊心力圓成非比等閒公案明眼自能勘取

順治丙申長至月望國子監司業兼掌祭酒事前戊辰二甲進士工部虞衡司郎中大理寺左寺副

曹溪慈祖弟子福徵道一居士譚貞默槃談撰



序

世尊說法四十九年未後拈花迦葉微笑曰吾以清淨法眼涅槃妙心實相無相微妙正法付囑於汝汝當護持更勅阿難副貳傳化無令斷絕教外別傳肇端於此自迦葉二十八傳至菩提達磨是爲西天四七達磨航海而來單傳直指六傳至慧能是爲東土二三能祖門下有南嶽讓青原思兩派嶽出臨濟鴻仰雲門法眼原出曹洞一花五葉於茲益驗傳至於今法眼一宗流行高麗雲門爲仰若滅若沒曹洞一宗不絕如縷惟臨濟兒孫寢昌寢盛三十傳至今現

住天童悟悟傳今破山明此皆祖祖相傳以心印心
 正法眼藏不至斷滅師十九受具徧叅諸方如博山
 雲門輩收拾不住走入金粟兩手交付開堂東塔惑
 亂人天馬祖一昭覺勤莫之或先會銅梁張大金吾
 欲建巴岳山特請歸蜀時師亦動大峨瓦屋之興境
 風吹至梁山萬峯不覺十載某昔年奉差金陵遇南
 中士大夫結社濟生菴叨與同叅後因王程期迫依
 依難別朝宗和尚告余天童衣鉢正在破山歸而求
 之何用他覓自愧道念不切三上九到遠遜古人年
 來屢向萬峯畧通消息然浮沉者半今年春師開堂

江安拜見之後真如象王回顧野干却走又如真大
 火聚直是近傍不得然師垂手爲人婆心切衆棒頭
 有眼惟接上根古人云我若一向舉揚宗教法堂前
 草深一丈癡頑眷屬可痛可悲匪獨癡頑已也昔周
 金剛擔青龍疏鈔出蜀直謂南方盡爲魔子及到龍
 潭疏鈔焚却夾山上堂因道吾一笑散衆直造船子
 從上宗師未有不知非便捨執言我得我會倔強到底
 今破師覩面龍潭船子現在目前趾相錯於道又
 不得不笑周金剛夾山輩不善用霸道真休貨也從
 今以後惟願大地衆生凡有緣得見語錄者作未曾

有想作難遇想作祖祖相傳以心印心濃滴滴真血脉想作正法眼藏不至斷絕想道行雖繫籍祖師門下然蕪蕪純純不與天下自號有名知識擔行奪市亦不掛龐道玄裴公美張無盡扁額直憑破師打則任打罵則任罵惟日拈香一瓣合十頂禮以表不相辜負一等毒氣云爾

崇禎壬午佛生日吏部尚書郎前紫薇舍人今菩薩戒弟子古戎郡秉素牟道行薰沐拜書

崇
禎
壬
午

佛
生
日

目錄

第一卷

序文三

上堂

第二卷

上堂

第三卷

上堂

第四卷

小叅

晚參

開示

第五卷

廣錄

機緣

第六卷

法語

茶話

第七卷

佛祖贊

行實

第八卷

拈古頌古

佛事

第九卷

書

雜偈一

第十卷

雜偈二

第十一卷

雜偈三

第十二卷

雜偈四

文

跋

目錄終

破山明禪師語錄卷第一

明成都府嗣法門人通醉等編
住浙江嘉興府東塔禪寺語錄

崇禎己巳年八月一日入院

師至大殿以坐具拂一拂云八字打開當陽拋出坐
斷報化佛頭底人正好不向佛求不向法求不向僧
求常禮如是便拜

伽藍殿炷香云前三三後三三俱在者裏弘護今日
被山僧一瓣香觸碎鼻孔莫惟山僧龕造
祖師殿炷香云一花開五葉至今狼藉不少更要起

模做樣作麼咄陞座告香云此瓣香秉兩儀之氣借四序之威幾經霜雪幾受風塵黑山鬼窟拾來遊戲場中拈出特申供養

三世諸佛歷代祖師惟冀廣長舌遍於大千爛折蘆檣於巨海次拈云喫盡國王水土養成一肚惡氣放之則彌六合卷之退藏於密信手拈來祝延今上皇帝聖壽萬安滿朝文武闔國公卿遠近檀那現前大眾惟冀同明般若共證菩提再拈云此瓣香斧斫不開刀劈不破一任風吹雨打遂成乾屎橛撞着忤逆兒孫不辭拈出爇向爐中供養見住金粟山廣慧

禪寺傳曹溪正脈三十四世密雲本師大和尚用酬法乳之恩歟衣坐云香已拈了更要說個甚麼山僧素志本欲深棲巖竇隱跡過時不意撞夥鐵面皮居士善具辣手慣會拏雲搜入者保社開張臭口說幾句燥脾胃話以光法門山僧自揣愚劣不會打葛藤只好舉則古入住院因緣以塞來命昔日訥禪師入院云圓通不開生藥舖单单只賣死貓頭不知那個無思筭喫著通身冷汗流者老漢住院還有個死貓兒頭賣弄腥羶遂引蒼蠅成群作隊山僧今日到院也無死貓頭賣亦無生藥舖開以手作擎瓶勢云单

单只有者個大衆且道者個是甚麼曹山好顛酒破山喫著曹山酒醉得通身俱是口瞎禿光兒罵上天又來拈棒打顛狗山僧恁麼告報非是壓良爲賤抑且法爾如然未審衆中還有傍不甘底衲僧麼如無更與諸人重下註脚葛拈拄杖卓一卓云還知麼知門途中受用不知則世諦流布喝一喝下座

開爐上堂問大悲千隻手那隻是正手師云四稜著地云大悲千隻眼那隻是正眼師云八面玲瓏云手眼不勞重舉似單傳意旨是如何師震威一喝云雙手劈開生死路一眼覲破是非關便拜師打云瞎師復鼓掌呵呵云也大奇也大奇

孫弘祚弘福弘來爲先祖簡肅孫公請上堂一念普觀無量劫非去非來亦非住如是了知三世事超諸方便成十力以拄杖卓一卓喝一喝云也甚奇怪山僧適才舉首上場詩引得尚書孫公跳上山僧拄杖頭上現大人相出廣長舌道山僧眼花不少被山僧

撰述

卷之三

一唱依然向拄杖頭邊默默隱去山僧所見如是未審諸人同見也無若也同見便見三世諸佛歷代祖師並及人人生身父母歷劫宗親全體如是來全體如是去全體如是住其或未然更聽山僧與尚書安靈題額去也以杖畫一畫云昔日君王爲柱石今朝佛法作金湯

上堂天得一以清地得一以寧君王得一天下太平衲僧得一海衆雲臻雖然總之一爭奈繙素分明舉其繙也兵隨令轉舉其素也將逐符行直饒不繙不素未是輶芥投針大眾正恁麼時如何是針芥相

投句龍得水時添意氣虎逢山處長威獰

上堂今朝正值臘月八釋迦原是小悉達經行忽地面仰天撞着明星刺眼瞎阿耶阿耶相救相救薦拈拄杖卓云幸爾還有者個在不然終是扶籬旁壁漢送法衣至上堂大庾嶺頭提不起鷄足山前成滯貨衲僧今日獲一披如雲普覆華王座大眾記取三十年後切忌不可動著何也動著則禍生

上堂天上月正圓人間道月半撞着閻羅王便把飯錢算咄休打算且待山僧細細與你從頭判天上月正圓陝府鐵牛頭角攢人間道月半嘉州大像皮毛

換撞著閻羅王大蟲被犬傷便把飯錢算兩個五百
是一貫不管三七念一二五十一十挨排算到臘月三
十日祇算得一半設或完全直待驢年阜拄杖下座
上堂爆竹一聲蒼天兩字草木昆蟲全彰意氣柳眼
拖不價之金梅梢吐不瑕之玉龍兒鳳子齊歌舜德
堯仁癩狗泥猪同和祖風佛日導羣情而越死超生
普萬有而豐衣足食當恁麼時還有不威而嚴無爲
而化者麼良久云東風吹出林間去惹得遊蜂嚦舊
新唱一唱

上堂今朝正月十五處處敲鑼撾鼓將謂移苦爲樂

誰知翻樂爲苦一念此界他方却被風隔雨阻放出
鐵鵝流星打殺街頭石虎引得彌勒呵呵笑到日輪
當午大衆且道笑個甚麼皆生大懽喜自知作佛祖
解制上堂東風解凍百草萌芽行脚衲僧如麻似粟
拖泥帶水今草鞋綈似虎混俗和光今拄杖活如龍
向有佛處不可住無佛處急走過方稱英俊衲家切
不可向萬里無寸草處去虛度生涯大衆且如山僧
者裏九旬白足三月調心今日解制臨行慶賞一句
作麼生道摘楊花摘楊花

佛誕日上堂山僧所患腹瀉撒尿不成屎概將此塗

招述

卷一百一十一

五

污諸人諸人鼻孔未徹徹不徹一條白棒當頭楔雖然怎奈事無一向今釋迦老人降誕之辰不無也要應個時節大眾且道應時及節一句作麼生道時一僧在衆鼓掌作聲師云還要第二杓惡水麼

上堂昔日龐居士將百萬家財一時傾向湘江逢人便會誇經賣紀道不與萬法爲侶者是甚麼人何如我存曾丘公也不一時恁麼漸漸破慳囊捨資帛寧不出龐老一頭地也是則也似似則未是何也怎奈同途不同轍大眾且道那裏是他不同轍處試檢點看檢點得出琉璃殿上騎金馬明月堂前輦綉毬其

或未然荆棘林中下腳易月明簾外轉身難

銅鍋至上堂存曾丘方伯不識好惡布施一口大鍋子要山僧煮鐵釘飯炊木楂羹供養盡大地人個個張口敲嚼著所以終日穿衣不曾掛著一縷紗終日喫飯不曾敲著一粒米山僧今日開此無遮大會豈肯私瞞普欲是天是人是僧是俗受此食者盡教同福同壽同證同得功超五界行越三賢未如是者且向碗底筋頭豁開兩眼切莫瞌睡將木楂羹鐵釘飯細細敲嚼看是甚麼滋味參

上堂時當毒熱渾如火逼得通身白汗流只爲諸人

不肯薦山僧特地一場愁咄愁個甚麼莫是衣不足
身食不足口麼然衣不足身不蠶而衣者有也食不足口不耕而食者有也但住世間名利富貴榮辱種
種亦復如是何足致愁所愁不愁別事单单只愁生
死交謝寒暑迭遷有物流動捨死趣生捨生趣死如
旋火輪無有休息所以愁耳今日金居士誕期營齋
供衆山僧只得因齋慶讚居士本意惟求壽命比南山
福德如東海雖然如是不若將此馳求之心用在生
死際頭行也如是求住也如是求坐也如是求臥也
如是求求來求去求得生死二字脫然無累方知

堅密身永證金剛無量壽

上堂昨日盆傾大雨今朝杲日麗天連累人衣乍乾
乍濕哄得草鞋增價增錢忽地乾坤一色宇宙同源
爲復是祖佛誕生爲復是神仙脫陰閒取拄杖子拄
杖子道是我施居士八十老母高陞壽域所以有如
是無量無邊不可說不可說華藏莊嚴海一一流出
無量無邊不可說不可說福德智慧門一一含容無

懷詠

和日禪白言錄卷一

量無邊不可說不可說壽命聚一一聚中或現大身
或現小身或現男形或現女形凡有所爲悉皆現之
山僧聞已入是三昧洞見十方無障無礙驂拈拄杖
卓一卓召大衆云還見麼眼窺海屋添籌處悟取中
間不老人

輶轡嚴居士送大悲菩薩進院請上堂士問千僧拱
侍法海波騰風恬浪靜則不問如何是興波作浪事
師云興波作浪了然平云如何是徹底掀翻事師震
威一喝云卽今大士歸禪院手眼憑師爲點明師云
瞎云爲甚麼轉大士爲羅刹則易化羅刹爲大士則

難非難非易一句作速道來師云截斷葛藤云依然
日午打三更師豎杖士拂袖歸衆師乃云福城東際
烟水漲大塔廟前樓閣開千手大悲捫不住無端放
出善財來大衆且道善財來作甚麼隨行踏斲流水
聲縱觀瀉出飛禽跡

送靈骨入塔請上堂問生滅去來卽不問亡僧立命
是如何師云主山前案山後乃云一葉落天下秋一
塵起大地收所以道因緣和合虛妄有生因緣別離
虛妄名滅殊不知我密化上座性真常中求於去來
迷悟生死了無所得旣無所得且道卽今在甚麼處

撰述

研山禪言錄卷一

八

安身立命葛拈拄杖卓一卓云還委悉麼不離當處
常湛然覓則知君不可見

上堂秋風起秋夜長未歸客思故鄉阿誰是未歸客
莫是三賢十聖是未歸客麼西天四七東土二三是
未歸客麼今日現前大眾若僧若俗是未歸客麼若
然歸者掉臂不顧其或未然且漫躊躇切不可終日
塵勞汨汨業識忙忙蹉跎過去急須緊繫芒鞋牢縛
裙襠勿思前算後思後算前中途懈退必要猛著
精彩葛直歸到故鄉田地方始住脚拈杖一卓云還
有恁麼人麼來到寶山須採寶莫教赤手又空回

寂開難髮請上堂金鋤削盡千峯雪露出天涯星月
孤照得世間人廓徹都來依樣畫葫蘆大眾未審還有
依樣畫得者麼有則不妨好手手中呈好手紅心
心裏射紅心其或未然且待山僧自畫去也以杖打
圓相於中擲地云層落落影團團千古萬古與人看
開爐上堂盡空盡界惡爐鞴人與非人俱在內烈火
猛烟恒熾然煅生煉死渾無礙放行則瓦礫生光把
住則黃金失色正當此際三緣未就二俱不了檀那
添煤添炭與之助力山僧扇風扇火與之激揚大眾
還有當爐不避者麼出來與拄杖相見一僧不出衆

喝兩喝師云焦頭爛額似粟如麻

臘八爲僧落髮上堂問別愛則不爲超生死鬚髮落地脫根塵別愛則不問如何是迥脫根塵句師云琉璃瓶子口云鬚髮落地作麼生師便打問當時雲門爲甚麼要打殺釋迦與狗子喫師云智眼難容云倘有人打和尚又作麼生師和聲便打云者一棒還是打雲門打弟子師云任你卜度乃云昨夜釋迦老子打鐵漆桶連累多少人頭破腦裂今日忍俊不禁也好是看孔著楔拈拄杖向空畫○云會麼於此會得說甚麼麻三斤乾屎橛要休便休要歇便歇所以道

無邊刹海自他不隔於毫端十世古今始終不離於當念其或未然更聽山僧曲引旁通去也復舉世尊初出母胎一手指天一手指地云天上天下唯我獨尊及至雪山苦行六年覩星悟道亦云盡大地衆生一時成佛了也據此判斷世尊一口兩舌處處惹人情見引得雲門大師道我當時若在一棒打殺與狗子喫貴圖天下太平然雲門大師只解騎虎頭不解捉虎尾遞相鈍置山僧當時若聞此語只消掩耳而出何也佛之一字吾不喜聞喝一喝卓拄杖下座上堂柴米油鹽事事空客來無計可融通山僧昨夜

動機火燒得須彌走芥中大眾還救取得麼試救取
看時維那舞坐具一喝便出師云只好救取一半然
那一半還須山僧自救何故輸得自己贏得他人
上堂有問有答鐵牛不怕獅子吼無問無答恰似木
人見花鳥所謂有物先天地無形本寂寥能爲萬象
主不逐四時凋雖然如是且道人畜龍仙鵠飛蟻動
魚鳥龜蛇空散消沉又作麼生聾以拄杖卓一下云
莫言四十今朝是三萬場中少一年

元旦上堂問黃道初開彩雲彌布如何是新年頭佛
法師云恰好云和尚還有爲人處_{金剛經}云有僧喝

師正色一嗟問天雨寶花空現寶色地隱山河芥含
塵刹如何是芥含塵刹師蓦頭一棒僧喝師打僧連
喝師連打云掠虛漢問新年原是舊年人如何是新
年人師云塗脂抹粉云如何是舊年人師云灰頭土
面云新舊相去幾何師云看取上頭註脚乃云今朝
新年頭昨日舊年尾新舊與尾頭總較者些子遂呈
拄杖云大衆且道者些子又作麼生較良久擲地云
從今拋擲春風堆裏一任花開花落

上堂山僧連日傷風佛法沒處起口檀越強逼陞堂
只好畧揚家醜以拄杖卓一卓云釋迦老子過十恒

河沙等佛土來山僧拄杖頭上口喃喃地露題露目了也汝等諸人還聽得麼顧視左右云且道釋迦老子露個甚麼題目聾落梅濺石青丸碎臥柳臨波翠帶殘喝一喝

解制上堂解開布袋口放出一羣牛繞砌等芳草芒繩貫鼻頭放去也東觸西觸收來也山悠水悠正恁麼時不收不放一句作麼生道拏雲自可容收放喝月誰能使去留

師誕日上堂問清白池前蒼古柏拈得彌盧作壽山今日拈來和尚如何受用師云子丑寅卯辰巳午甲

乙丙丁莫莽鹵云恁麼則白雲片掛根埋千尺便禮拜師云莫眼花乃云三十五前一著子本無生也本無死釋迦狼藉雪山頭彌勒收歸布袋裏葛拄杖云今日落在山僧手裡逢人切莫錯舉

師荆頭上堂山僧昨日髮鬢鬆誰料今朝頭顱禿個事從來本現成大都只是人輕忽不輕忽咄咄六六原來三十六

佛誕日上堂問底也問四月八答底也答四月八兩三三沒偈墮都盧只逞口頭滑引得釋迦老子一時惡發指天指地獨尊已大却被雲門一棒要打殺

撞著琅琊道個將此深心奉塵刹今日山僧不解暗裏抽橫骨明中墮舌頭只好輕輕道個活驚殺活笑殺大眾且道驚個甚麼笑個甚麼檢點得出強中更有強中手惡人還有惡人磨

上堂問海乾日出時如何師打僧喝師又打僧又喝師云三喝四喝後如何僧無語師乃云古佛與露柱相交逢人且說三分話金剛與泥人揩背未可全拋一片心正恁麼時是誰境界靠拄杖云默默自知田地穩騰騰誰謂肚皮愁復舉東印土國王請般若多羅齊王問諸人盡轉經唯師爲甚不轉祖曰貧道出

息不隨衆緣入息不居蘊界常轉如是經百千萬億卷據山僧看來本是一卷不斷頭經却被尊者話爲兩橛致使無人信受奉行今我翼乾沈大人請陞座山僧自忖口門窄盡力道不出個元字脚只好將遠祖這卷不斷頭經拈向人天衆前下個註腳以拄杖卓一卓云還會麼下文繁長付在來日

上堂六月炎天傾大雨聲聲因地啓無生洞知五十年前事滿目飛埃不是塵如是則截瓊枝而寸寸是寶析栴檀而片片皆香其體也奚四山之可恃其用也非五色之能媒正恁麼時不涉體用一句作麼生

撰述

何人所著

三

道以拄杖卓一卓云有時扶過斷橋水依舊伴歸明

月村

解制上堂休夏自恣千古同規諸佛歡喜衆生皺眉
喜者甚喜悲者甚悲以拄杖卓一卓云惟我木上座
迥出悲喜之外終日閒閒倚牆靠壁却被山僧握在
手中放之則撐天拄地收之則七縱八橫發大機顯
大用佛來也與一頓魔來也與一頓現前若僧若俗
若男若女來也與一頓過去七世父母歷劫宗親有
主無主乃貴乃賤來也與一頓復卓拄杖云且道山
僧何故如此聾不獨聖制告圓大家做個滿散喝一

喝

地藏菩薩誕日上堂豎拄杖云大眾見麼有眼必見
復卓一卓云聞麼有耳必聞如是聞見分明所以陞
座爲汝諸人證據且道聞個甚麼見個甚麼莫是地
藏菩薩捨其尊貴而降卑小爲汝四衆發大誓云衆
生度盡方證菩提地獄未空誓不成佛麼雖然汗馬
功高要且不是衲僧巴鼻以杖敲杏凡云不若山僧
今日更爲諸人翻案去也何故衆生度盡不證菩提
地獄已空誓不成佛恁麼告報還知落處麼卓拄杖
下座

支那

皮山雜志卷一

七

撰述

司山元詩錄卷一

四

孫起伯請建大悲閣上堂山僧住此二三秋拄杖芒
鞋未徹頭千手大悲來摸索一莖草上現瓊樓如是
則塵塵垂手刹刹現身垂一手則千手萬手俱備舒
一日則千目萬目皆然其慈也與三世諸佛同其悲
也與一切衆生共玉殿瓊樓因念而感雲路丹霄隨
心而至問古殿藏僧棒巍樓顯法幢法幢今大顯棒
頭盲未明望師慈悲旁通一線師鷲頭一棒云謝師
指示師云血滴滴地云直截根源如何道聾師正色
一喝士亦喝師云你也喝我也喝是甚麼意盲士笑
云原來大悲閣推托不去師云要且未徹山僧拄杖

芒鞋在大衆且道拄杖芒鞋作麼生徹去以杖卓一
卓云拄杖卓頻鵠膝短芒鞋踏久蝦鬚長

結制上堂鷲拈拄杖卓一卓喝一喝云會麼若也會
得便知結制從此結解制從此解結解本同源桑田
變滄海其或未然更聽山僧爲汝諸人說偈註破福
城結制三冬惟有今年最克捉敗五湖衲子兼收四
海獛龍天人尚未預數佛祖豈立上風會得棒頭喝
下管教及第心空喝一喝下座

送靈骨入塔請上堂問昨夜紫霞朝北闕今朝瑞氣
向南開且道靈骨入塔後作麼生師云魚行水濁鳥

飛毛落問諸行無常卽不問一命歸西事若何師云東西不管南北不收云死去生來不依本分過在其麼處師云脚跟下好與三十棒乃云颶颶腥風撲面來肩頭酸處口難開分眞一具黃金骨東擲西拋經幾回莫是一爲無量無量爲一得麼且喜沒交涉莫是小中現大大中現小得麼且喜沒交涉莫是菩提涅槃真如佛性得麼且喜沒交涉莫是山河大地明暗色空得麼且喜沒交涉莫是四大本空五蘊非有得麼且喜沒交涉既然未得且道作麼生是覺然上座底黃金骨百骸俱潰散一物鎮常靈

上堂問虛空無背面八面絕玲瓏向甚麼處安身立命師云懷州牛喫禾益州馬腹脹乃云十五日已前爲人膾滴滴地十五日已後爲人血滴滴地正當十五日爲人乾暴暴地朝打三千暮打八百畢竟落處如何黃狗喫食黑狗遭殃

清白爲覺凡業師入塔請上堂師云纖塵不染淨衆衆地絕承當寸絲不掛赤條條地無回互所以道和合妄生和合妄死旣生死都盧是妄妄有罣礙染污而著其間今辰覺凡定公學徒請山僧爲伊陞座露布葛藤者翻是無罣礙處立罣碍無染汚處成染污

[括述]

何故我王庫內無如是刀金屑雖貴落眼成翳大眾且道頓超一句作麼生道南北東西收不得天堂地獄孰能該

臘八解制上堂一點明星刺眼開輝天鑑地嘆奇哉當時想是無禪客若有和聲打落腮試檢點看若檢點老子有甚麼過要與和聲打落腮試檢點看若檢點得出不枉在者裏朝參暮請之勤長期短限之逼其或未然連山僧龜毛拂兔角杖亦只好擲向福城東際又東際去何也爲衆竭力禍出私門

師誕日上堂問世尊生時指天指地和尚生時有何

祥瑞師云七縱八橫云恁麼慶賞一句又作麼生道師打云別有曇花一朶新便拜師云莫眼花問三十年前行棒行喝三十六年後度人已畢正當三十年以何爲人師聳頭一棒上喝師連打兩棒乃云山僧久不陞座想是舌頭爛却四衆與吾慶生震威痛下一喝乃喝一喝云大衆且道者一喝落在甚麼處時四維上座以兩手掩耳師復兩喝下座

結夏上堂東塔今年結夏老牛老馬歸舍雖無水草供看且有鞭繩惡辣正當恁麼時未審衆中還有擎頭戴角者試出來跨跳看時象崖西堂以兩手作擎

空勢師云且喜相共拖犁拽杷下座
省覲天童過慈溪馮宅祇園請上堂請赤馮居士問
一葉落天下秋秋卽不問如何是葉未落已前事師
云體露金風云卽今池竹千竿庭花數朵又向何處
安身立命師云莫眼花乃云生老病死苦根源徹得
根源便豁然此際閻羅難下手誰將因果對君姑
是則塵塵混入刹刹圓融應以宰官身得度者卽現
宰官身而爲說法應以童男童女身得度者卽現童
男童女身而爲說法凡有所爲悉皆現之而爲說法
雖然要且未徹向上關捩在如何是向

河心上影佛祖眼中塵下座

解夏上堂今朝七月十五處處追宗薦祖山僧總不
恁麼單牧一頭水牯所謂法無定相隨寓卽宗以一
事明則千差萬別無不明事以一理契則萬別千差
無不契理然而事耶理耶無不從此法界流究竟還
歸此法界所以道實際理地不受一塵佛事門頭不
捨一法大衆正與麼時德山棒臨濟喝麻三斤乾屎
橛庭前柏樹子青州布衫重七斤還當得鬼神茶飯
麼當得本分草料麼試辨別看若辨別得出一恁擣
頭戴角宇宙縱橫其或未然莫將學解爲知解剔起

根述

卷之三

七

眉毛仔細看

退院上堂山僧肚裏亂如麻伎倆無能盡爪牙千日
杖頭卓處活龍蛇遂卓一卓云還有恁
麼人麼試出來現躍飛騰看良久以杖橫肩云榔栗
橫擔不顧人直入千峯萬峯去下座

破山禪師語錄卷第一

終

破山明禪師語錄卷第二

明成都府嗣法門人通醉等編

住西蜀夔州府梁山縣萬峯山太平禪寺語錄

崇禎癸酉年四月初三日入院

據室云萬峯山頂別人間上有梧桐門台歡不是假
鷄樓泊處個中唯許鳳凰參顧視左右云有麼有麼
時一居士向前問訊師云鷄樓鳳巢非吾同類

開堂上堂師詣座前以杖擊云棒敲千樹梅梢月喝
一喝云喝散萬峯山頂雲露出華王獅子座當陽一
著許誰登大眾見麼遂陞拈香云此辦香形同枯木

摸述

卷之二

一

狀似鐵牛曾向十字街頭橫行直撞今在萬峯手裡
倒弄顛拈爇向爐中端爲祝延今上

皇帝萬歲萬歲此瓣香無聲無臭非木非石孔氏
莫測其踪諸葛奚窮其跡爇向爐中奉爲
蜀王殿下此瓣香逢強卽弱遇柔則剛統中外之權
衡樹是非之赤幟爇向爐中奉爲閩省文武官員高
登祿位此瓣香冤入骨髓過犯彌天自從親遭毒手
此是第二番拈出爇向爐中供養現住浙江寧波府
鄞縣天童景德輝禪寺傳曹溪正脈第三十四世密
雲本師和尚用酬法乳之恩歛衣趺坐上首曰偈云

法筵龍象衆當觀第一義師云若論第一義白樞上
座已露了也更要山僧鼓兩片皮弄三寸舌堪作甚
麼雖然如是要且新萬峯不忍杜口去也只能向無
言語處形言語無機用處發機用終不似三家村裏
裝啞賣聾咳吐掉臂以當宗乘中極則我這裏禪道
佛法如山之高似海之深須具過量者來畧較些子
去如或未然以柱杖卓一卓云且向這裡薦取諦觀
法王法法王法如是

上堂問生死關頭事如何師云七叉八篆云正恁麼
時向甚麼處安身立命師云蒲峽口橫說豎說天龍

一

卷之二

八〇

峯頭顛尾顛士喝師便打士云這向無情破屋藏躲
曠劫生死今朝徹底掀翻現出本來面目師徵云如
何是你本來面目士云本來面目誰似他水中浮月
鏡裡花蕩蕩空空無不是歷歷分明更不差師云差
也差也問石砫坪萬峯山相見了也卽今陞座更爲
阿誰師云莫眼花問鐵牛不怕獅子吼獅子卽不問
如何是錙牛之機師云怕殺人僧喝師云者喝濟得
汝甚邊事僧無語師乃云太平寺裡新開堂衲子齊
來露所長儘力吐無元字腳有何佛法

上堂問如何是萬峯境師云青青翠翠山頭

何是境中人師豎杖云直直條條肩上橫云無境無
人時如何師便打僧連喝師連打乃云春至百花開
秋來黃葉落四時尚不遷誰縛欲誰脫如是則知天
地同根萬物一體聖凡一心古今一道事理一揆更
無一絲毫強言巧詐處而人向此轉生人我妄計是
非輪迴是中自取流轉今日山僧只得向好肉上剜
瘡虛空裏掘洞舉拄杖召衆云還見麼見月休觀指
歸家罷問程

朔日上堂識得一萬事畢南山起雲北山下雨震威
喝一喝云娑竭羅龍王被山僧一喝駭得倒退三千

擬述

破山禪真錄卷三

三

里大地降了一夜濃霜個個凍得腰腿熟睡大衆且道醒來受用一句作麼生道乾坤老我一頭雪歲月消磨百甕蓋

上堂十五日已前爲人前不構村十五日已後爲人後不抵店正當十五日棒如雨點喝似雷連大衆且道是甚麼意旨作何話會一馬生三寅

上堂問如何是諸法實相師便打僧佇思師云死漢僧禮拜云假饑劫壞時實相在甚麼處師云合取狗口乃云山僧纔上蒲團正在做夢忽遇尹居士作禮請陞座山僧自揣世出世法渾然是夢妻財子祿也

是夢真如佛性也是夢田園屋宅也是夢菩提涅槃也是夢爲官爲吏也是夢成佛成祖也是夢所以道一切有爲法如夢幻泡影如露亦如電應作如是觀此是閉眼的夢還有開眼的夢待大衆禮拜了卽向伊道尹居士跪乞說破師驀頭一棒下座

上堂問如何是異類中事師云這畜生云也須還我話頭來師打僧喝師復打進云棒頭縱有真消息也落時人第二機師云如何是第一機僧擬議師打云不識痛癢問朔風凜凜卽不問梅花爛爛事如何師云你鼻孔爲甚被他換却僧喝師便打問如何是打

死人的棒師便打僧作死勢仆地云如何是活人的
棒師高聲云將者死屍拖出去僧卽起趨出師乃云
山前山後雨濛濛就裡渾無一竅通惟有山僧拄杖
子撐天拄地活如龍大眾且道朝打三千暮打八百
成個甚麼邊事衆無語喝一喝下座

臘八日上堂問有物先天地正恁麼時是先是後師
云待天龍峯點頭卽向汝道問世尊拈花迦葉微笑
未審笑個甚麼師云笑汝不薦僧禮拜師乃云今辰
柳居士爲我釋迦老人成道來山辦太平齋山僧只
得因齊慶讚以拄杖畫○云大眾會麼士作禮卓然
無人問一點明星是禍胎

上堂昨夜梅花香宇宙今朝雪子搗長空就中一點
真消息拈向諸人鼻孔中薦呈拄杖云未證據者向
此嗅嗅看是甚麼意旨時一僧踏跳作舞而出師以
拄杖擲地云穿過髑髏

因雪上堂颯颯風聲動林野飄飄雪片滿丹墀當年
有個龐居士問著十人九不知如是則陰陽造化從
此始而人不覺被寒暑境物熱瞞了也舉龐居士叅

一古德命十禪客送至門外士云好雪片片不落別處有泉禪客云落在甚麼處士云恁麼語話只恐閻羅老子未敢放汝在卽今檢點將來二俱是個瞎漢何故聾居士雖解鍋中點水不妨龜裡添柴者僧將爛糞梁梗打狗誰知有去無回當時若是萬峯預數待伊道好雪片片不落別處只消握一雪團蓦口一擲管取老大龐公聞風結舌大眾還知檢點處麼莫言清蚤起更有不眠人

解制上堂問如何是體中玄師打云如何是用中玄師亦打云如何玄中玄師連打兩棒乃云萬峯解制

萬峯雪封住聖凡人路絕只許獍龍躍碧空橫身天外搖長舌說道一切法不有一切法不滅問取諸人向此長期短限就中者點徹不徹徹則掉臂不顧不徹從前與眉毛廝結何故太平寺裏原與諸方迥別上堂問峯巒挺秀鶴不停機未審夜來還許歸巢否師云松樹下一場慷慨云長飛去時如何師云腳跟下好與三十棒乃云昨夜濃霜鋪大地今朝杲日麗長空個中一點真消息怒起泥牛吼萬峯所以道欲識佛性義當觀時節因緣時節若至其理自彰如迷惑悟如我字水上座曾向三乘十二分教已具一隻

眼猶未得少爲足親來萬峯窟爲激揚正是時節因緣到也復舉周金剛自註青龍疏鈔畢乃云三乘十二分教畧頗龕知終不聞南方一類魔子道直指人見性成佛自此出蜀途中遇一婆子賣點心與之買喫婆云我有一問上座若答得則與點心如答不得請別買曰試道看婆云金剛經云過去心不可得現在心不可得未來心不可得未審上座點那個心周無語婆指參龍潭及到談及此事夜深潭云請歸單去周便出却回曰外面黑潭點一紙燭度渠周擬接潭與之吹滅周於此大悟次蚤自點一火炬到法

堂舉起云窮諸玄辯似一毫置於太虛竭世樞機若一滴投於巨壑便燒却師云試看者著子未悟時以舌尖利辯認爲大海殊不知似一毫而已從吹滅紙燭時方知小大不相容隱且道未悟時云三乘十二分教畧頗龕知還知個甚麼已悟後又悟個甚麼還委悉也無未到盡驚山險峻行來方識路高低師誕日上堂問正睡著無夢時主人當在何處師云待烏石峯點頭卽向汝道云摸索不著師拂面云一摸便著士無語問和尚誕生是有量如何是無量師云耳朶原來兩片皮乃云人人道我生我生則我死

後述

印光堂藏書

應知生死根棒徹虛空髓驚起石烏龜能吞鐵鷄子
大眾當恁麼時不涉春秋一句作麼生道任汝數到
劫雲初不識平天花甲子

四月八結制上堂問從上諸祖所傳正法眼藏涅槃
妙心涅槃妙心卽不問如何是正法眼藏師云瞎進
云瞎師云是你瞎是我瞎僧鼓掌呵呵頂鞋而出師
云大似西施戴箬帽乃云今辰是我釋迦老人從摩
耶腹中走出周行七步目顧四方一手指天一手指
地云天上天下惟吾獨尊起干戈之時節也後出雲
門賊道我當時若見一棒打殺與狗子喫貴圖天下
隊裡安禪平夷一併拈却處處楊花吐烟

太平亦是鈎賊破家不免旁觀者晒萬峯恁麼告報
未審衆中還有抱不平底衲僧麼有不妨推倒禪床
喝散大眾寧不俊哉如無且向萬仞峯頭結夏千軍
隊裡安禪平夷一併拈却處處楊花吐烟

上堂黑漆皮燈籠中間欠點紅有人解挑撥無處不
光通大眾莫是三世諸佛橫說豎說處是解挑撥麼
料掉沒交涉歷代祖師顛拈倒弄處是解挑撥麼料
掉沒交涉明宇趙居士施點長明光燈處是解挑撥
麼料掉沒交涉今日營齋供衆處是解挑撥麼料掉
沒交涉香燈早晚殷勤處是解挑撥麼料掉沒交涉

既總未是畢竟是甚麼人解挑撥聾以杖指燈云我見燈明佛本光瑞如此

上堂問和尚大開爐鞴高舉鉗鎚十方衲子恁麼假煉去師云只有汝一個不薦云推倒爐鞴時如何師打進云恁麼錦上添花師亦打進云春風得意馬蹄疾踏遍長安萬樹花師云閑言語乃云酸醱甕裡多蚊蚋破驢脊上足蒼蠅我這裡沒唼噉漫棲泊有扇打有烟薰食生怕死漢不用上吾門卓拄杖下座

上堂天晴日頭出落雨地下濕人情所必然何用強分析不分析且道寒棟宇到者裡牧一羣水牯牛痛添草料驀豎杖云還會麼少間向碗底筋頭上薦取卓拄杖下座

上堂年年七月十五惟有今年最苦田禾又被天收人物盡遭賊擄太平寺裏今朝解制明上座不妨隨例顛倒以拄杖一時打散歸方丈

結制上堂舊年始今年末爐鞴鉗鎚分外惡任是銅頭鐵額來頂門一擊傾湫嶽如是則全殺全活鑄利砦於目前半掩半開運腐淳於腦後千妖百怪結舌藏鋒十聖三賢潛踪絕跡正恁麼時且道鳳泉黃居士祈嗣一句作麼生道麒麟出而鳳凰現金輪御而

校述

卷之二

九

玉燭調下座

上堂云今辰尼足上座營齋供衆請陞座露布者個消息然者消息自我釋迦老人初出母胎一手指天一手指地云天上天下惟吾獨尊已露了也後出孔聖人道未知生焉知死吾無隱乎爾亦露了也更要山僧露布個甚麼雖然事無一向有條攀條無條攀例復舉韓文公參大顛禪師問春秋多少顛舉數珠云晝夜一百八公回致疑次早再來至門前見首座舉前話問意旨如何座扣齒三下及見理前話顛亦扣齒三下公曰原來佛法無兩般顛云是何道理公

曰適來問首座亦如是對顛乃召首座是汝如此對否座曰是顛便打趁出院師云者個消息文公若不深入虎穴爭得虎子大顛雖有定亂之謀且無安邦之計大似打蠻子駭好人大衆大顛不肯首座則且置祇如今時人與古時人春秋數日畢竟是多少還委悉麼饒君晝夜一百八數到驢年卒未休

砌丹墀畢上堂復古太平寺淒然感廢興寒灰八百載破衲兩三僧黠鼠居香積妖狐吹佛燈黃金重布地不識有誰能

上堂昨夜冬瓜勸瓠子今朝瓠子勸冬瓜分明曲直

兩條路去者如何不到家大衆且道誰是途路客誰
是到家者屋北鹿獨宿溪西鷄齊啼

佛成道日上堂天上明星突出釋迦打失一日回觀
六道四生個個如蟲禦木
上堂值放爆竹乃云一聲爆竹響元宵露柱燈籠話
寂寥漆桶依然還不快青黎拄杖打驢腰卓拄杖唱
一喝云討甚麼碗

師誕日上堂此衆無枝葉唯有諸真實薦呈拄杖召
大衆云且道者個是真實是枝葉試辨別看若辨別
得出盡未來際不曾生盡未來際不曾滅淨熙熙絕
眼前過不覺老從頭上來

結夏上堂正仁張居士爲我釋迦老人降誕之辰澆
一杓惡水要山僧痛爲雪屈只得驅天龍峯倒卓蒲
峽口橫開說幾句長言短語應個時節遂高聲云世
亂年荒件件微道人行履白如圭饑食渴飲渾無事
煉得身輕同鶴飛

上堂問盡力道不出句分付阿誰師云猢猻入布袋

僧舞坐具而出師嗟一聲乃云十方同聚會天龍八部人非人等個個學無爲卓拄杖一下云唯有者個不墮諸數此是選佛場東邊牛欄西邊馬棬前是山門後是佛殿心空及第歸淳底自是淳暴底自是暴萬峯恁麼註腳且道還有龐居士轉身吐氣句也無時破雪一喝師卓拄杖下座

上堂云如何是諸佛出身處東山水上行如何是諸佛出身處西河火裡坐如何是諸佛出身處薰風自南來殿角生微涼咄也是三人證龜成鱉

上堂六月一毒熱極路上人頂傘田中人戴笠此事

極分明何用強分析喫不分析將爲赤鬚鬍更有鬍鬚赤

辭院上堂遼東走西脚跟猶未點地去此就彼鼻孔依舊遼天龜毛拂子刺瞎釋迦眼睛兔角杖頭敲破狸奴腦蓋蒲峽口讚揚莫及金鵝池水洗不清只得撩起便行亦是令行符到正恁麼時且道如何行履響菊徑兩行烟淚落引鞭一轡馬蹄黃

上堂問自見自心情見便破時如何師云舌頭不出口云和尚莫瞞我便拜師乃云大地分明一座爐聖凡渾是火柴頭挨挨擠擠無他伎一度生烟一度愁

大眾且道那裏是他生烟處莫是出生入死是生烟處麼超凡越聖是生烟處麼無明煩惱是生烟處麼貢高我慢是生烟處麼喜怒哀樂是生烟處麼若也如是則攀宇宋居士祈嗣設齋得非生烟而何所以道凡有所求一切皆遂將無明而證解脫卽煩惱以獲菩提混作一話頭朝也如是暮也如是行也如是坐也如是如是參如是究參到情忘見絕智泯心灰因地一聲方得倒斷還會這個麼覓火和烟得擔泉帶月歸

上堂長期短限不惜寸陰暮請朝參非圖蛙步且如俊鷹快鶴終登鳳子龍兒人人氣宇吞空個個光明含象不因正打旁敲奚具銅頭鐵額雖然如是要是且諸方大有人不肯何以故開門放出郎當漢腦後分明欠一錠

上堂問不與萬法爲侶者是甚麼人師云頭上漫漫脚下漫漫問萬法歸一一歸何處後高峯大師道我當時打失一隻眼且道那裡是他失眼處師云十字街頭碌碌乃云萬峯今歲強開爐柴米油鹽事事無珍重兩堂雲水客肚餓須用箋條瓶子則知馬祖囑藥山云近日見處作麼生山云皮膚脫落盡惟有

撰述

一真實祖云汝既如是何不拾取三條篾籧著肚皮隨處住山去山云某甲は何等人物故言住山祖云未有常行而不住未有常住而不行欲益無所益欲爲無所爲宜作舟航無久住此師云藥山老漢受恩深處便爲家只得恁麼去馬大師憐兒不覺醜只得恁麼行萬峯者裡雖是與他同條生不與同條死也無真實處那更有皮膚以百日爲限以徹爲期各各放開肚皮隨處鼓粥飯氣何以故男兒自有冲天志不向他人行處行

上堂問如何是透關句師云胡笳塞上知音少羌笛

城頭和者稀云劔爲不平離寶匣藥因救病出金瓶師云閒言語問垂鈎千尺意在深潭離鈎三寸意旨如何師云會取鈎頭意莫認定盤星問金未出鑽時還入鑽也未師一喝問燈燈續燄重拈舉千指黃鸝聚杖頭重拈卽不問如何是聚杖頭師云知音不必頻頻舉達者須教暗裏驚云恁麼不恁麼則鑽山透海幾鯢鯨師啐一聲乃云兩又不成雙獨又不成隻曼殊三更二長慶蒲團七德山末後句雲門顧鑑喫萬峯者裏不恁麼無孔鐵錘當面抉擗拄杖云參

撰述

石山禪師錄卷二

上堂今日萬峯解制驢唇馬嘴齊出渾如春燕喧梁
宛似秋蟬語樹拄杖芒鞋致疑石頭瓦塊督地分明
告報諸人只恐諸人不薦卓拄杖召大眾云還薦麼
草鞋腳底疑無路拄杖前頭別有山下座

上堂古人道第一句薦得與佛祖爲師第二句薦得
與人天爲師第三句薦得自救不了雖然如是要是
魚魯參差刀刃相似今日山僧又且不然第一句薦
得好肉剜瘡第二句薦得虛空掘洞第三句薦得爛
泥有刺山僧恁麼告報且道與古人是同是別時一
僧鼓掌呵呵師噓一聲下座

住梁山縣中慶禪寺

上堂拈香畢乃云山僧向南方走一回拾得幾個金
剛圈一籃粟棘蓬今日向人天衆前不辭拈出與諸
人共相吞跳以拄杖打圓相云者是金剛圈試跳看
僧云跳師舉拄杖云者是粟棘蓬試吞看僧云吐師
云多口阿師未在僧無語師云不容跛鰲盲龜會只
許通方作者知

上堂撞到今朝五月一荒田瘦土都栽畢我儂有首
洗泥歌唱出令人笑屎滴哩哩囉囉哩種田博飯
家常事不是飽食人不知復舉數衲子結盟行脚中

撰述

石山房藏

途值雨投地藏院宿。藏問禪客從何方來。一僧云南方藏曰。南方佛法近日如何。云商量浩浩。地藏曰。何如我者。裡種田博飯喫云怎奈三界何。藏曰。喚甚麼作三界僧。無語。師云。這飯袋子大似逆風揚塵。自取撲面。若是個漢。待他問。南方近日佛法如何。只消當面便睡。更再如何。若何拂袖便行。不惟疑著地藏。亦且不玷行脚山僧。恁麼告報未審。衆中還有旁不肯底。麼良久。云行脚不開。如是眼草鞋。終被石頭欺上。堂般。若如大火聚。四面不可入。般若如清涼池。四面俱可入。大衆且道。入底是不入底。是試檢點看。若

檢點得出。不妨到方丈裡通個消息。

上堂今日四明日五處處追宗薦祖。個裏衆生。自恣都來。腳蹈手舞。爲復是妙用。現前爲復葉風飄鼓。今朝聖制告圓。試爲老僧分析看。若也分析得大蟲原來。是老虎。其或不然。蒼天中更添冤苦。

上堂師云。今朝七月十五。乃我禪和結制之辰。雖是兩衫一賽。要且不離這個以拂子打。○云還委悉麼。佛子住此地。則同佛受用。復舉馬祖。翫月次。一曰好供養。一曰好修行。一拂袖。便出。祖云。經歸藏。禪歸海。惟有普願獨超物外。師高聲云。馬大師板齒生毛分。

星撥兩恁麼道總是第二月且道如何是第一月留待夜來江上落照人無復冷湫湫

上堂一僧以手掩師口師打一拂僧遂走云休捏怪師拈拄杖打出乃云棲鳳今朝散水雲縱橫逆順任教行破沙盆是正法眼恐逐腥膻汚却盆震威一喝下座

上堂煅煉幾團頑鐵入火龕而出火細療理一個病人吞藥易而吐藥難只須吞吐得宜入出得所慈悲下智之庸愚成就上根之利器若遇冷焯熱燒牛溲馬溺任是偏鵠盧醫見之拱手巧匠良工聞而吐舌門首足病人

上堂說心說性毒蛇頭上揩癢舉古舉今饑鷹爪下奪食明上座不吐一詞却違所請只得因齋慶讚去也以拄杖畫○召大眾云會麼若也會得東家牛滲那西家馬出鵝羊擇乾處尿驢揀濕處屙其或未然中和峯頂雲蒸飯佛殿塔前狗屎天下座

住夔州府開縣棲靈寺

上堂拈香畢乃云一塵不立毘盧墮在凡夫十虛舍

支那

支那

七

換述

卷之三

三

吐管賢失其境界縱橫理事收放主賓納須彌於芥孔擲大千於方外繇是大中現小小中現大一爲無量無量爲一正恁麼時且道福國祐民一句作麼生道一旦氣埃清四海垂衣王化自無爲復舉陸亘大夫與南泉語云肇法師也甚奇怪解道天地同根萬物一體泉指庭前牡丹花云時人見此一株花如夢相似師召大衆云且道南泉此語是過譽語是寓譏語試辨別看若辨別得出玉堂金馬登科第腐草殘花壯帝都下座

上堂卓拄杖一下云大衆聞麼木上座爲汝諸人轉

根本法輪去也塵說刹說熾然說無間歇復以拄杖擲地云頻呼小玉原無事只要檀郎認得聲

病愈上堂問元徹生平不叅禪不學道祇拾得一把金剛劖能截斷天下老和尚舌頭今日舉向和尚前未審如何抵敵師合掌云善哉善哉云不露鋒鉢時如何師云白鐵漢僧一喝師云再喝一喝看僧擬測師云灼然乃云病僧爲病極說法乖法式靜地念摩訶尋聲入福慧所以道我本無病爲衆生病衆生病除我病亦無未審衆中還有病不病者麼良久云二十年來經藥餌不知此疾是膏肓

撰述

補遺卷之二

上堂舉海底泥牛啣月走巖前石虎抱兒眠鐵蛇鑽入金剛眼覓備騎象鷲鷲牽此四句偈內有一句能縱能奪能殺能活檢點得出一生參學事畢此是高峯盡生平伎倆驗盡天下衲僧無一人出於上者大約此偈不經檢點山僧亦有四句舉似大眾螻蟻推起萬斛舟蝦蟆唱遍楚天秋烏龜跳上須彌頂瑪瑙珊瑚盡害羞大眾試檢點看檢點得出來方丈裡通個消息

上堂云如何是佛麻三斤如何是佛乾屎橛如何是佛殿裏底三文大光錢買一个麻糍喫在肚皮裡當

下便不饑

上堂問日用有見聞夜夢無知覺者個消息中誰覺誰不覺請和尚道一句看師云猢猻入布袋云覓之不可得師卓拄杖云毫釐有差天地懸隔擬心被心隔擬法被法隔擬禪被禪隔擬道被道隔擬佛被佛隔擬物被物隔擬事理被事理隔擬是非被是非隔擬生死被生死隔擬涅槃被涅槃隔不擬被不擬隔正當恁麼時不差不隔一句作麼生道山頭白浪逐魚游海底紅塵驚鬼走

上堂問不參禪不念佛只學得一箇無心應萬物師

模述

云那裡是汝無心處云無心豈有處師驀頭一棒云
者個聾乃云者個事三乘贍喪十地魂驚變大地作
黃金攬長河爲酥酪拈一莖草作丈六金身將丈六
金身作一莖草坐微塵裏轉大法輪如是則古人道
有一物明歷歷黑漆漆上拄天下拄地常在動用中
動用收不得大衆既在動用中爲甚麼收不得速道
速道

上堂眼若不睡諸夢自除心若不異萬法一如所以
道我有時見山不是山見水不是水見僧不是僧見
俗不是俗見男不是男見女不是女見人不是人見
畜不是畜有時見山是山見水是水見僧是僧見俗
是俗見男是男見女是女見人是人見畜是畜如是
則全明全暗雙放雙收一句作麼生道下坡不走快
便難逢

上堂昨日三今朝四俄然不覺霜澆地朔風凜凜骨
毛寒吹起個中無孔笛韻出漫游雲蘇通前後際非
五音非六律問取拄杖子道個直條條赤灑灑終日
倚牆靠壁參

上堂舉世尊陞座默然而坐阿難白提曰請世尊說
法尊云會中有二比丘犯律行我故不說法阿難以

撰述

布山禪師語錄卷第二

他心通觀是比丘遂乃遣出世尊還復默然阿難又
白適來二比丘已遣出世尊何不說法尊云我誓不
爲二乘聲聞人說法使下座師云據山僧看來世尊
大似壓良爲賤若是棲靈門下要且不然若有人代
尊者云衆中有不清淨者已出請和尚爲衆說法只
向他道爲汝說法竟恁麼告報不獨辨魔擇異且要
流通正眼以拄杖卓一下云還委悉麼禍不單行
辭衆上堂擺棹臨江走一頭絲綸纔展浪橫舟收來
放去如何速此處無魚別下鉤下座

破山禪師語錄卷第二

終

破山明禪師語錄卷第三

明成都府嗣法門人通醉等編

任順慶府廣安州渠縣祥符禪寺語錄

上堂拈香畢乃云古岸灘頭擲釣臺絲綸初展去還
來輕波浮定有無意負餌金鱗夢眼開以杖作垂釣
勢云有麼有麼時有僧禮拜起一喝拂袖而退師云
領取鉤頭意莫認定盤星良久復云毛吞巨海萬頃
風濤闊聒聒芥納須彌十方世界淨裸裸以大圓覺
爲我伽藍四生六道盡集其中行住坐臥屈伸俯仰
迎賓待客屙屎放尿拈匙弄筯動靜閒忙無不承此

恩力所以道佛子住此地則同佛受用常在於其中
經行及坐臥夫如是會人人悟證平常個個七穿八
穴不待啐地折曝地斷如紅爐點雪冷灰爆豆正與
麼時祝聖開堂一句作麼生道鵠弓已掛狼烟息萬
里歌謡賀太平

上堂年年臘月八黑豆解生芽水母因無眼求食須
仗蝦明星射腦蓋捏目便生花此道如何會瞿曇是
釋迦

上堂問三界無法何處求心師便打僧喝師復打云
心包太虛量周沙界師云重言不當吃問果日當空
洞荒忙補不好補得好長安幾個知天曉喝一喝

上堂今日強登曲木圓音一吼震山谷人非人等
驀相逢彈指頓超煩惱窟如是則知正堂禪師不離
煩惱而證解脫卽生死以般涅槃來山僧拄杖頭上
倒駕慈航現無邊神變道兩句苦辭去也大眾還聞
否且道是那兩句聾耳邊多少閑題目賺我光陰十
萬程

上堂天地未始父母未生渾忘物我撥榔渠誰以拂

子一畫書○云自此一畫一圈而分兩儀四象八卦六爻以至吉凶否泰爻會岐殊妙辯懸河伯城瓶鴻無出此一圈一畫之中未始未生之際復畫○云若也薦得改禾莖爲粟柄易短壽作長齡其或未然有限身心時不待無情寒暑日相催

上堂潛水年年秀宕山歲歲青只因人不覺剛自見遷更以拄杖卓一下云擊碎蟠桃核分明露本仁圓成清淨智卽此是無生

除夕上堂今朝臘盡與年窮處處人燒松火蓬惟有此間一種別冷清清地閑叢叢復舉昔有秀才請益

趙州曰佛滿一切衆生願是否州云是曰弟子要和尚手中拄杖可與否州云君子不奪人之所好曰我不是君子州云老僧亦非佛師云秀才雖有定亂之謀且無安邦之計趙州探竿在手引草隨身不妨奇特中顯奇特好手手中呈好手將謂本分翻爲分外山僧正眼看來纔啓口處好與三十棒何也祥符門下賞罰分明

上堂問萬法歸一一歸何處師云宕山石開眼潛水浪潑花僧禮拜師乃云滿天和氣布地韶光柳眼迸開梅梢慙破花枝似錦鳥語如簧七穴八穿篆不雕

之心印千頭百緒演不說之妙門頭頭上顯物物上明以拂子畫○召大衆云還會麼山川皆佛理草木盡文章

追嚴上堂元宵正月半日月燈明現卽此爲亡靈本光破諸暗蓋子撲落地碟子成七片露柱撞燈籠山門騎佛殿此意是如何吾道以一貫

師誕日上堂問和尚跳出生死圈如何又是今日降誕師云被你疑著僧禮拜師乃云突出難難難辨別擬之易易易承當一聲因地盡生死下座云請續後句

上堂問月未圓時如何師云合進二月正圓時如何師云恰進云星月不現時如何師云劄僧禮拜師乃云蓮胎未質梅語不萌洞空劫之本有盡今時之自得到此則人人常光現前個個壁立萬仞只饒海屋添籌南山增算猶是化門邊事且道不涉延促一句作麼生道一溪紅白桃李樹四野青黃菜麥田

上堂問是法非思量分別之所能解爲甚麼唯佛與佛乃能知之師云知音不必頻頻舉八兩原來是半斤僧禮拜師乃云施主強請陞座多說不如少說少說不如不說何以故是法不可不言詞相寂滅復舉

換述

卷之三

藥山久不陞堂院主白曰大眾久思示誨山曰打鐘
著衆纔集山便下座歸方丈院主隨後問曰和尚許
爲大眾說法爲甚一言不措山云經有經師論有論
師怎怪得老僧師召大眾云昔日藥山今朝祥符且
道是同是別良久云草地雷聲晴天霹靂兩個古錐
都來是賊

上堂止止不須說葛藤遍野不爲多我法妙難思糾
著幾個便賣弄諸增上慢者冬瓜直罈侗瓠子曲彎
彎聞必不敬信只緣無眼耳鼻舌身意山僧恁麼判
斷且道釋迦老子還有轉身吐氣走七年始悟家生

不是佛是佛何愁不解語

上堂值驢鳴師云平地起孤堆虛空墮地走撞著瞎
驢鳴將謂獅子吼震威一喝下座

追嚴上堂春日晴黃鶯鳴聲韻出觀音門有人向
此活機括刹刹塵塵現勝身如是則余氏夫人不離
當處而遍沙界不歷僧祇以獲法身來山僧拄杖頭
上現一行三昧去也卓拄杖召大眾云還聞麼若將
耳聽終難會眼處聞聲方始知

上堂雲凝覺春盡雨過知花殘了達覺知處恁忙亦
是閒忙閒卽且置試道覺知處如何了達不遇春風

花不開花開又被風吹落

辭衆上堂今朝三月十百日禪期畢衲子問如何棒頭薦面抉曼殊前後三長慶蒲團七卽此罷爐鉗幾能成大器擲拄杖云祥符解開布袋放出一羣猛虎不會獅子翻身個個解打口鼓以手拍口云謹謹

住順慶府廣安州大竹縣無際禪寺

上堂拈香畢乃云鳳山挺秀燕水迢遙鶴不停機龍難湊泊就中有現躍飛騰者麼一機透徹千途萬轍同歸一道坦然十聖三賢齊赴喝一喝下座

上堂如何是祖師西來意庭前柏樹子覩著則耳聾大眾會麼字經三寫烏焉成馬

上堂三春已盡九夏初臨山中茶老田裡秧青蠶婦採葉農夫催耕頭頭合道法法皆真所以道世諦語言資生業等皆與實相不相違背大眾且道不違背處如何履進坐斷十方猶點額密移一步看飛龍上堂若以問答是禪禪非問答若以坐臥是禪禪非坐臥若以動靜是禪禪非動靜若以生死是禪禪非生死若以憎愛是禪禪非憎愛若以取捨是禪禪非

撰述

取捨若以語默是禪禪非語默正當恁麼時且道如何是禪
 轉泥牛耕破波心月木馬嘶通劫外風復舉
 梁武帝前爲樵夫打柴次忽值雨投破寺躲見佛雨
 地以自戴笠與佛蓋之後報爲王所以道不信但看
 梁武帝曾將一笠蓋如來是以不迷本因五里一庵
 十里一寺又感初祖航海而來迎內供養問曰朕每
 嘗造寺度僧未審有何功德祖云實無功德帝自此
 開悟悔昔所作所爲盡是有爲功用今日看來一佛
 一祖鼻孔各別一個是荷葉團圓似鏡一個是菱
 角尖尖似錐

上堂有問有答踏著秤錘原是鐵無問無答鼻孔依然搭上唇且道問底是不問底是卓拄杖一下云叅
 四月八祈嗣上堂年年四月八處處浴悉達者裡不恁麼焚香活燒殺何以故是法平等無有高下復舉
 世尊初出母胎周行七步目顧四方一手指天一手指地云天上天下唯吾獨尊後出雲門道我當時若在一棒打殺與狗子喫貴圖天下太平師云一個意
 在東南一個志向西北若是無際門下二俱好與三十何故聾山僧棒頭有眼復舉杖云試道祈嗣句子
 如何昨夜九龍吞宇宙今朝佛賜一麒麟

上堂裔字張居士祈嗣請特特舉揚宗教續佛祖慧命所以道不孝有三無後爲大以生死涅槃也是一大山川社稷也是一大田園屋宅也是一大妻財子祿也是一大然大之一字總是無人替得故曰爲大山僧另有極小小事亦無人替得試問諸人如何是極小小事聾良久云只有屎尿是個小事也要人人自去始得

上堂開示問昔日李長者金磚布滿祇園今日李居士營齋供衆其功是同是別師云鼻孔原來下頭大云恁麼則不直截道一句師鶯頭一棒僧禮拜師云自我初祖覲東震旦國有大乘根器得得航海而來直指人心見性成佛以言句露者消息易惹人情識垂戾直指之旨後出臨濟大師以棒喝接機則杜絕情識痛與棒熱與喝如擊石火似閃電光直下令人無廻避處如將梵位直授凡庸更不如何若何謂是知痛癢漢近來去聖時遙情竇日鑿又將棒喝處穿鑿不少以打處云痛切審痛底是誰可憐生不獨不會吾祖棒喝之旨且不會鼻祖西來之意然鼻祖以言句定旨蓋蘇通執心執性之謂後以棒喝定旨蓋蘇通嚼言嚼句之謂豈是以打處痛處云知痛癢耶

撰述

破山和尚詩卷

若如是會則吾祖者條棒早已均折了也西來大意
早已抹殺了也又安繼於今日復豎拄杖召大眾云
還會此意麼千鈞之弩不爲鼷鼠而發機

追嚴上堂苦雨盆傾下愛河長欲波魚龍沉巨浸孤
鬼隱深坡竹杖落塵少芒鞋增價多亡靈承此力彼
岸忽經過所以道處生死流驪珠獨耀於滄海居涅
槃岸慧輪孤朗於碧天正恁麼時且道不涉二途一
句作麼生道隨順世緣無罣礙涅槃生死等空花

上堂豎拄杖云者個事明歷歷黑漆漆十聖三賢從
此熱瞞歷代祖師從此悟證一切衆生從此摸索不
著所以香嚴道去年貧未是貧今年貧始是貧去年
貧猶有卓錫地今年貧錫也無復卓拄杖云大眾且
道如何是無底道理喝一喝下座

上堂問何火無烟而自明師云解打鼓云何水無魚
而蛟注師云解打鼓云何鏡非銅而光輝師云解打
鼓云頭頭盡是虛玄趣物物全彰處處真師云閒言
語僧禮拜師乃云學道之人不識真只爲從前認識
神無量劫來生死本癡人認作本來人此是古人一
首上場詩山僧今日拈向人天衆前下個註腳殊不
知識神與本來人相去不遠只在就中辨別若也辨

撰述

卷之三

別得出處處綠楊堪繫馬家家有路透長安其或未然山僧更爲諸人曲引旁通去也復舉仰山問中邑如何是佛性義邑云譬如室有六窓中安一獮猴外有人喚云猩猩獮猴卽應如是六窓俱喚俱應仰云只如獮猴睡著時又作麼生邑下禪床把住云猩猩與汝相見師云雖是餓逢美食渴遇甘霖不無齦嘴粘牙連皮帶骨若是破山門下又且不然待開口時和聲便打何故殊相劣形同幻質呼驢喚馬總虛名辭衆上堂漲水蝦蟆日夜催道人不薦渾忘歸今朝解了忙閑結嚴草溪頭絕是非如是則知隨處作主遇緣卽宗以一處透千處百處一時透以一理明千處百處一時明擬透不透之機關行超佛祖測明不明之理趣位越人天以拄杖畫此云還透者個麼還明者個麼若也明透得去不枉檀信慇懃山僧銳志復呈拄杖云會麼嚴草溪頭休住脚五巔山下莫橫身下座

住瀘州江安縣蟠龍禪寺

上堂祝聖畢白梃云法筵龍象衆當觀第一義師云若論第一義觀則落一落三不觀則落七落八釋迦到此計窮力極謂之如來禪達磨到此攔腮旁脊謂

撰述

荷山藏書

之祖師意雖然作用不同要且瓦是泥做山僧今日
到此口似橡盤眼如掣電思索幾句聊酬所請諸方
此日同開爐惟有蟠龍意致殊不向此中求煅煉冷
冰冰地自如如喝一喝下座

上堂關門打睡接上上機顧鑑頻呻曲爲中下據此
山僧有口只好挂壁上若以拈槌豎拂爲禪病在持
捉若以裝聾害啞爲禪病在口耳若以咳吐掉臂爲
禪病在音韻若以揚眉瞬目爲禪病在顧視若以手
舞足蹈爲禪病在蹲跳既然未是且道如何是禪東
瓜直籠侗瓠子曲彎彎

上堂問掬水月在手未審水乾波盡月歸何處師橐
頭一棒僧喝師連打兩棒問金出鑽時如何師云嚇
殺人云恁麼則橫身踊躍師云死逼逼地問父母未
生前如何是學人面目師云雨打梨花夾蝶飛風吹
柳絮毛毬走云原來原來師橐頭兩棒乃云一點雨
一點濕居士辨齋和尚喫試問就中意若何摩訶般
若波羅密

上堂問蝦蟆丘蚓尚解逃禪跋釐盲龜却能知有爲
甚伶俐衲僧反道不會師云箍桶漢僧喝師云如法
箍云只得恩深轉無語懷抱自分明師打問二十年

撰述

卷之三

前被葛藤絆地滿眼生塵如何是不生塵處師云趙州道底云又是甚麼光景師云薦取下句註脚乃云凜凜朔風吹散廬人人凍裂個皮膚就中有點天然別分付梅花樹幾株如是則知寒暑迭遷生死交謝有物於中流動未獲天地同根萬物一體復召大眾云還委悉麼維那云委悉則不堪師喝一喝下座上堂問庭前露柱久懷胎生下嬰兒頗俊哉爲復是神通妙用法爾如然師云橫開不在春枝上云未解語時先作賦一朝直取狀元才師云別有風流一段奇問若論此事三賢瞻顫十地魂驚未審利害在甚麼處師云腳跟下豎去橫來問大地山河歸一點萬派乾坤一竅中卽今一竅在甚麼處師云腦後見腮不與往來僧禮拜師一喝乃云今朝十一月初一衲子齊來討巴鼻厲色震威喝一喝喚驚打怪聲兩耳昔人擬作觀音門今又翻爲鶯子智只此告報與諸人惟要諸人信得及信不得及無孔鐵錘當面擲不須擬議更尋思信步羊腸彎直去

上堂終日病魔嘶結懶饒二寸綿舌強登曲承木牀一味唱風棒月復舉臨濟行化至一家門首曰家常添鉢有婆曰太無厭生濟曰飯也未曾得何言太無

撰述

厭生婆便閉却門師云據臨濟素有當仁不讓於師尚男不和女鬪山僧者裡也不行化施主也不掩門日日喫齋喫茶只是當不得太無厭生

上堂問今日國令更嚴不許向大明國裏拋沙撒土師云山大多狐兔水滿足魚龍問水明老蚌懷胎後雲重蒼龍退骨時老蚌懷胎卽不問蒼龍退骨時如何師云也是蠟人向火云不是巨靈手怎敢望華山師云不薦當陽句徒來念詩章云可惜連城璧徒勞獻楚君師正色噓一聲云杜撰宗師如麻似粟師云只有你一個乃云石頭瓦塊亂商量癩狗泥猪罵上

堂翠竹黃花纔側耳東瓜瓠子便承當此四句內有一句能縱能奪能殺能活檢點得出一生參學事畢上堂雲門一字關臨濟三玄要湧仰擅門庭曹洞別堂奧法眼道不知觸著便踏跳惟有蟠龍無剩言饅頭開口呵呵笑大眾且道他笑個甚麼心生大懽喜自知當作佛

上堂一聞千悟拗折弓箭放下屠刀九上三登拋却瓶箑典當布單更有牢籠不住呼喚不回者又作麼生指示過蟻難等穴歸禽易見巢

上堂日用事無別踏著秤錘原是鐵唯吾自偶諳十

撰述

研山庵自記錄

字街頭碌磚頭頭非取捨鶴寒上樹處處沒張垂鴨
寒下水朱紫誰爲號一任鑽龜打瓦丘山絕點埃惟
有者裡瞞不得神通並妙用火官頭上風車子運水
及搬柴貓兒尾上繫研錘龐居士恁麼道新蟠龍恁
麼拈非是與古人鬪勝要且路見不平

上堂問山高不露頂雲深不知歸時如何師云遠岫
雲封壁平溪水結瀾云未審意旨如何師卓拄杖云
向此薦取間冷心不動月澄潭鴛鴦繡出自白雲間且
道鴛鴦繡出時如何師云不把金針度與人問靈雲
覩桃花得悟因甚玄沙不肯師云爲伊眼花不少云

未審意旨如何師云瞎僧禮拜師乃云山僧今日上
堂來步步泥踪點法臺徹夜不妨霜與雪西園猶放
碧梅開驀呈拄杖召大眾云見麼見得徹去能銷億
劫顛倒想不歷僧祇獲法身其或未然有寒暑兮促
君壽有鬼神兮妬君福

元日上堂問相逢著眼流水行雲脫胎神化嬰兒漸
長流水行雲卽不問嬰兒漸長事如何師云長長一
個矮子云恁麼則白花競秀妙德家風一亘晴空普
賢境界師云燦天燦地云金蓮焰奕千家樂玉露回
光萬象新師云腳跟下好與三十棒乃云輕烟薄霧

假述

石山寺目錄卷三

古

鼓風濤吹徹梅花白樹梢珍重諸人惜鼻孔清香不
對野狐瓢擲拄杖云狼藉不少

上堂衆禮三拜師云會麼者裡倒身三拜少林分骨
分髓今朝正眼看來也是槎巴兜鬼喝一喝下座
住廣安州大竹縣佛恩禪寺

掃大持師翁塔上堂問始別三巴去終歸桑梓來請
問還鄉曲作麼生道師云哩囉哩囉云未審大持師
向甚麼處安身去也師卓拄杖云會麼云我則不然
打僧拂袖出師乃云山自青今水自綠其中一具
黃金骨巍然坐斷長松村日有風雲常拭拂如是烏
用忤逆兒孫拈帚堂前而爲祭掃者哉蓋謂人人本
具個個不無這具黃金骨一向東擲西拋出生入死
改頭換面戴角披毛不知生之來處死之去處所謂
佛佛出世唯爲一大事因緣然祭掃者何如世俗中
爲臣當盡其忠爲子當盡其孝則仁義道中理不可
無吾教中亦有授受之源燈燈相續則師資之禮亦
如是總之祭掃爲活計不明一大事因緣則祭掃何
幹耶畢竟二六時中將生死二字叅來叅去叅到不
疑之地方可皇恩國恩三宗九族恩一時報畢大眾
且道報恩一句作麼生道將此深心奉塵刹是則名

撰述

宿山房遺集

爲報佛恩喝一喝下座

豎佛殿上堂問如何是佛恩境師云長長短短千株樹云如何是境中人師云落落零零幾百僧云人境已蒙師指示如何是臨濟當陽句師豎拂子云會麼云恁麼則知恩有地去也師震威一喝問古人拈一莖草建梵刹竟且道新佛恩今日又作麼生師云八方有道歸王化四海歌謠賀太平云恁麼則石花山畔金聲振驚起丹林雙鳳兒師云著乃云佛恩殿上雙師踞地大持堂前孤鴻戾天二水逢源一山挺翠高也明也悠也久也廣不替之松風奇哉俊哉善哉萬獅麟自此歸

偉哉多非遙之桂月因如是也產如是人行如是事利如是衆非是地勝人賢要且名成實就大衆且道新佛恩眉毛還在麼卓拄杖云千千龍鳳從茲止萬獅麟自此歸

住梁山縣金城禪寺

上堂拈香畢維那白椎云法筵龍象衆當觀第一義師云且道第一義作麼生觀若以眼觀觀處卽瞎若以心緣緣處卽乖既不以眼見心緣試與老僧話會看時二僧出衆跳一跳喝一喝師云還有麼二僧無語師以拄杖卓一卓云今日與諸人撥轉關頭去也

機述

石山齋遺集

還見麼杖頭日月光天德照破山河瘴癘開白椎云
諦觀法王法法王法如是下座

上堂獨踞金城第一峯滿天星斗現穹窿老僧高著
青蓮眼看得衆生與佛同所以道火不待日而熱風
不待月而涼鶴脰自長鳧脰自短松直棘曲鵠白烏
玄本自現成何假修證大衆正恁麼時修證卽不無
染污卽不得一句作麼生道一點明星當午現九蓮
花果自芳妍

上堂問如何是金城境師云寨小規模大云如何是
境中人師云僧甲世界寬二五人境相去多少師卓拄
明佛本光瑞如此

誕日上堂卓拄杖召大衆云會麼這個與老僧同壽
從盡未來際正月二十一乃至盡未來際二十一算
數譬喻不可說不可說無量壽不思議福德海壽命
聚不獨老僧如是三世諸佛亦如是歷代祖師亦如
是天下老和尚亦如是一切有情無情非有情非無
情非非情等亦如是復卓拄杖云饒君數到劫雲初
不出平天花甲子

上堂問大地平沉微塵不納是何人境界師豎杖云
直條條地絕承當云原來是某甲境界師打僧喝師
復打僧拂袖出師云逐塊不少問如何是佛師云你
是僧云如何是超佛越祖句師云兩頭三面漢問學
人幾番問話幾度被打今日復來乞師指示師便打
一僧達一匝這裡得來久埋海島非古非今卽今拈
出刺破天下老和尚面門未審作麼生回互師云羞
殺云刺破了也師云重言不當吃乃云止止不須說
我法妙難思諸憎上慢者聞必不敬信下座

都來脚踏手舞爲復是妙用現前爲復業風飄鼓今
朝聖制告圓試爲老僧分析看若也分析得大蟲原
來是老虎其或不然蒼天中更添冤苦

上堂七月十五舊城罷慶八月十五雅城陞堂雖是
兩彩一賽要且不離這個似夢子打○云還委悉麼
佛子住此地則同佛受用不知是馬祖翫月次一日好
供養一日好修行一拂袖云經歸藏禪歸海
惟有普願獨超物外師高舉一喝大師板齒生毛分
星撥兩恁麼道總是第二月並道如何是第一月留
待夜來江上落照人無復冷冰冰

撰述

破山禪師語錄卷第三

上堂一僧以手掩師口師打一拂僧遂走云休捏怪
師拈拄杖打出乃云棲鳳今朝散水雲縱橫逆順任
教行破沙盆是正法眼恐逐腥膻污却盆震威一喝
下座

破山禪師語錄卷第三

終

破山明禪師語錄卷第四

明成都府嗣法門人通醉等編

小參

陞座山河大地明暗塞空時人不識強覓西東存曾
丘老大人生一死恁麼來恁麼去還悟也無悟則
見山是山見水是水見明是明見暗是暗見空是空
見塞是塞見君是君見臣是臣見父是父見子是子
見兄是兄見弟是弟見男是男見女是女其或未然
見山不是山見水不是水見明不是明見暗不是暗
乃至見男不是男見女不是女總之夢幻空花徒勞

提述

高僧傳記卷之四

把捉存曾丘公向山僧拄杖頭上七縱八橫口喃喃地所供如此山僧所示亦如此正恁麼時如何委悉卓拄杖云卽此見聞如幻翳回觀三界若空花陞座雨落地下濕過蟻難尋穴天晴日頭出歸禽易見巢正當不晴不雨之際非難非易之時又安任居士令先室卽今在甚麼處安身立命以拄杖卓一卓云還會麼若於此會得便是恩愛盡而生死盡煩惱斷而佛道成其或未然且向山僧拄杖頭上著眼好諸仁者只如山僧拄杖頭作麼生著眼聾極樂娑婆都併却棒頭喝下悟無生喝一喝卓拄杖下座

陞座臘末春初萬象新拖金垂柳弄啼鶯乃聲乃色難遮覆韻出令人悟本真如是則我廣育孫夫人素所念佛持經操家訓子還悟得本真也無若也悟得始知今日生死亦如是苦樂不如是男女亦如是恩愛亦如是哀樂亦如是乃至一切榮辱種種悉皆如是薦拈拄杖云旣爾如是且道卽今安身立命一句作麼生道超聲越色隨他去鳥笑花吟自在身

陞座世出世法渾無取捨舉古舉今了無延促點燈籠而撞露柱騎佛殿以跨山門昔龐居士道有男不婚有女不嫁大家團圓頭共說無生話將入滅謂靈

照曰視日早晚及午以報照遠報日已中矣而有蝕也士出戶觀次靈照卽登父座合掌坐亡士笑曰我女鋒捷矣龐老次日亦去其子務農聞之卓鋤立化龐婆遂將夫兒骨骸荼毘畢乃云者夥不啣留漢都做模做樣令人檢點我若去時卽不然也以手指石卽裂隱身石中不見山僧看來龐婆雖有纖塵不立之手段而無萬法爲侶之督情不若我和石孫居士不下龐老之列曾同妻兒老小翻龐老公案云有男須婚有女須嫁也不團圓頭無生豈有話故令先正黃氏孺人暗會機宜符合斯旨脫灑灑地男也不顧

女也不憐夫也不辭孫也不戀孤迥迥峭巍巍高出
龐婆一頭地汝等諸人還知去處麼若也知得塵塵
盡是寶王刹刹刹無非返佛場其或未然更聽一偈
頓然了却兒孫債忽地丟開夫婦情撒手竟行渾不
戀曷同婆去石藏身

孝子陳侍橋追嚴請陞座士問哀哀父母生我劬勞
欲報深恩昊天罔極別有可報之門請師的指師墓
頭一棒士云恁麼則四恩總報去也師云也要汝自
肯乃云諸行無常是生滅法生滅滅已寂滅爲樂此
四句是我釋迦老人涅槃時說而文畧義周則包括

一大時教也言諸行者何廣則萬行要之不出六種卽布施持戒忍辱精進禪定智慧是也旣謂之無常以何是常莫是生滅滅已是常耶寂滅爲樂是常耶若以生滅滅已是常又同有作有爲之諸行則頭上安頭若以寂滅爲樂是常亦是無爲無作之定性則斬頭覓活夫如是者殊非兩此卽寂滅而不妨熾然生滅卽生滅而不妨靈然寂滅然寂滅者一剎那間無生相可得一剎那間無滅相可得故曰寂滅就中轉凡成聖異世同風無逾於此所謂三世諸佛之所證蓋證此也一切衆生之所迷迷此也故寂滅之樂

非天上人間之樂而可喻卽今西橋長者生前操家訓子呼奴使婢田園屋宅夫婦兒女悉是無常及於自身眼耳鼻舌身意六根六塵六識悉是生滅法以拄杖卓一卓云正恁麼時如何是常法不離當處常湛然覓則知君不可見

陞座僧問如來爲破有法王敢問和尚如何所破師打云破也復舉藥山久不陞座一日院主請上堂山默然便下座王云大衆久思和尚示誨如何一辭不措山云經有經師論有論師怎怪得老僧然而一佛一祖說法豈肯悟慈舉古舉今事無一向老僧亦有

撰述

破山和尚

四

兩句聯酬所請曹山好頰酒其毒過砒霜來斷命根者須將親口嘗

金陵觀音庵陞座師云觀音庵內打鼓文殊院裏上堂塵說刹說熾說無人向此承當幸我姑蘇葉居士爲嚴父鑑革大人春秋五十來此營齋供衆請山僧向人天衆前播兩片皮露者消息擬欲說心說性說常說斷自有三乘十二分教詮註不休亦是座主發布了也雖然畢竟山僧說些甚麼天地玄黃宇宙洪荒日月盈昃辰宿列張陳將謂破山肚裏有甚奇特原來只是個千字文底鼻祖也

陞座卽心卽佛頭上安頭非心非佛斬頭覓活所以道恁麼也不得不恁麼也不得恁麼不恁麼總不得既總不得安有捨生死而趣涅槃離煩惱而獲解脫向者裡薦得青青翠竹無非般若鬱鬱黃花總是真如其或未然幾片白雲橫谷口許多歸鳥盡迷巢陞座者個活鱗鱗處阿誰不具那在遣昏敵散眸睂努目起蚤睡晚長期短限以了平生所以佛祖無他只在動靜忙閒觸著磕著處發明者個活鱗路頭不見三祖到恁麼田地便作信心銘曰至道無難唯嫌揀擇但莫憎愛洞然明白你們厭喧求靜得失取捨

撰述

孫少卿集卷四

五

死死生生凡凡聖聖總是揀擇如何是不揀擇底句
良久云只待來年蠶麥熟羅候羅兒與一文

復舉玄沙與保福擇菜次偶論佛法不覺失聲一笑
沙責云汝者一笑損了許多利益何也暫時不在如
同死人保福自此確志不羣果後聲名千古我儂者
裏又且不然每見兩堂雲水終日鼓掌呵呵也無許
多損益似超古人一頭地也恁麼說話也是爛泥中
有刺汝等既辨冲霄氣宇來這裏同甘淡薄祇欲究
明生死那有閑情作戲得不太喪天日乎其中縱有
過量者亦不可將人品不立愈有高卓愈要小心豈

不聞如臨深淵如履薄冰聖人尚爾我安不然必要
尊乎其事後勝於前令人信而不誣也苟圖活計假
銜雌雄東去打一掌西去築一拳不惟自屎不覺臭
亦壞自己聲名我儂非是有意尊大來兄弟前作個
狀頭終日口喃喃告訴無非只要大家掌件事做所
以玄沙掣指香嚴擊竹靈雲見桃花遇境逢緣千了
百當不是造作安排亦非偶然特地只是一味胸頭
礙膺處廝結不開方有見色明心聞聲悟道之局不
是爾輩今日三明日四說時似有不說則無放叅止
靜隨境漂流徒溷日子我出家行脚二十年來所作

撰述

研山齋集

六

所爲靡不受盡雖依金粟老人往返六載只得一個老和尚暗識我敗闕處其餘盡把我作個泥猪癩狗看待終日憎嫌終日障礙每聞盲龜跛鰐浩浩商量那個孤硬那個柔弱再不說起自己長短濶狹爾我者裡切忌莫學者家種草了無結果之日在我者裡只說者裏話雖然兒時做處老也知羞定不是泥龍石虎空獲其狀但凡不倒斬處畢竟頻頻請問數數提撕當信時不待刹那異世兄弟肯依我儂結個驢年道友何愁碓觜不生花還委悉麼一衆稽首師合掌云道泰不傳天子勅剛刀奚取我儂頭

小參師達禪牀一帯陞座云會麼於此會得便會釋迦老人初出母胎周行七步目顧四方一手指天一手指地云天上天下唯吾獨尊我儂今夜又且不然雖是周行一帯何止七步似超釋迦老人一頭地也何則天上天下個個獨尊所以道男兒自有冲天志不向他人行處行其或未悉更聽葛藤復云者個消息也不在言端語端說得花簇簇錦攢攢以致無疑也不在遇境逢緣會得孤迥迥峭巍巍以當了事惟貴二六時中觸處生疑有疑不決千沒奈何萬沒奈何便是好處然而此際或發一問或示一機自合構

撰述

破繩齋詩集

汝到那不疑之地始信從前恍恍惚惚是是非非念子都盧撒向他鄉外里去也自然頭頭上現物物上彰復何難易而可較哉寧不聞昔有一僧問巖頭起滅不停時如何頭咄云是誰起滅其僧乃悟而悟便是不疑不疑則是千了百當猶香巖之擊竹靈雲之桃花盡向聲色裡廓徹如汝諸人眼底耳底豈無如是聲色因何不悟觸若面牆蓋爲只要在別人嘴角頭喫些涕唾胡過日子縱得飽叅智過鴉子辯似懸河亦濟得甚邊事復以手拍口云多說不如少說少說不如不說何也諸法寂滅相不可以言宣

陞座云老僧撒砂撒土不覺過了百日爾等朝參暮請恍惚又是一期釋迦尚有三七思惟達磨況乃九年面壁今爲汝等解制且道叅作麼生放制作麼生解還委悉麼試看春風吹綠野應教龍象任縱橫陞座驀豎拄杖云者個物明歷歷黑漆漆上拄天下拄地常在動用中動用中收不得既收不得且道濱源程居士卽今在甚麼處安身立命復以拄杖卓一卓云濱源居士被山僧拄杖頭接引來也汝等諸人還見麼若也見得便見胎生卵生濕生化生有色無色有想無想非有想非無想一切種中衆生安身立

一樁述

破山禪師錄卷四

八

命處其或未然更聽山僧收因結果去也以拄杖卓一下云擊碎惡魔諸苦趣端然證入妙蓮心

陞座百十三昧無量妙義盡向一毫頭上徹得根源去此是從上先德開門見山之機語也山僧今日舉似嵩環居士還徹也未若也徹去回觀三際浩然大均薦豎拄杖云見麼喝一喝云聞麼薦在見聞認賊爲子如或不薦將子作賊恁麼也不得不恁麼也不得且道如何卽得遂豎拂子云卽此見聞非見聞休將子賊較疎親耳邊多少閑題目賺我光陰十萬程陞座吾宗無語句亦無一法與人縱有言句不無是分別之所能解

陞座豎拂子云示真實義向此會得卽我釋迦老子初出母胎一手指天一手指地周行七步目顧四方天王天下唯吾獨尊乃至說法四十九年露布一大時教亦此註脚所以道唯我一人而能救護我爲法王於法自在如我所得法微妙最第一然者一我字

的體露頭露面切莫推在聖賢分上卽人人動止施爲非我而誰復拂一拂云葛藤有話無人說付與隔林幽鳥啼

晚參

師云一向倚牆靠壁乘虛接響以當了事古人不應有言如無手人行拳無舌人解語所謂絕後再甦方始欺君不得豈非心意識穿鑿卜度耶損法財滅功德最惡無過心意識大眾且道無手人作麼生行得拳無舌人作麼生解得語以是言之大端教人大死一回自薦自家境界非借別人鼻孔出氣如是則知

教外別傳一派好消息盡從者裏流出寧假牆壁影響邊熱瞞還委悉麼過蟻難尋穴歸禽易見巢

晚參我儂無甚巧安排地自種分田自裁養了一堂禪和子眼睭睭地學癡獃所謂大智如愚大巧若拙喎適才現前踏跳底是甚麼良久顧視云不是盲龜便是跛鰐

晚參十五日已前爲人佛所護念十五日已後爲人魔所攝持正當十五日是佛底是魔底是試道看如無莫將閑學解埋沒祖師心

復舉天寒人寒大家在箇裏滴水滴凍無甚閒工夫

拔述

石山房集卷之四

庭際之人况自覓心不得衲衣下事誰諳野火燒山
千重百市沒遮攔漢去胡來絕回換所以道無邊刹
海自他不隔於毫端十世古今始終不離於當念大
衆且道不離當念一句作麼生委悉鶴飛千點雪龍
起一團水

晚參參禪無秘訣只要生死切生死苟切頭頭自是
平貼如聞報寇相似各各宵次中忽起驚疑怖懼使
之於逃動之於竄畢竟到那千里萬里無殃之地不
自平帖而自平帖矣是以參禪之法就中不別急於
生死關頭討個活路自然出言吐氣定國安邦

晚參三世諸佛說不到處月似彎弓少雨多風歷代
祖師行不到處五里一個亭十里一個舖今夜明上
座者裏總不恁麼中和峯頂雲漫漫萬松關下水潺
潺

晚參若到親切處莫將問來問既不來問安知親切
處明上座又且不然若到親切處須將問來問何故
從苗辨地因語識人

晚參舉傅大士法身頌云空手把鋤頭步行騎水牛
人從橋上過橋流水不流皓布裙云此頌只頌得法
身邊事未頌法身向上亦頌云昨夜雨霧亨打倒蒲

撰述

卷之三

三

葡萄柱底柱撐底撐撐柱柱到天光依舊可憐生
明上座今夜喫茶無可呈似向我古人頌中逐句下
個註脚聊酬所請昨夜雨霧亨下雪又下霜打倒蒲
萄棚樹動知風狂柱底柱撐底撐賺錢不費力費力
不賺錢撐撐柱柱到天光杲日出扶桑依舊可憐生
兩個是一雙山僧恁麼註脚也是叫屈抱贓試問衆
中有理會得出者麼理會得到方丈裡通個消息
晚叅結制解制固是千古常規只以百日千日便盡
終始也惟此脩行一事非同一說便休但未始初念
有所未契處痛與生死二字切之又切便是結制只

待將素所疑所碍物豁然冰釋到那不疑之地便是
解制之日詎以長期短限而遂終始耶然天下叢林
喧喧浩浩以禮義者習禮義以道德者習道德以寬
恨者習寃恨肆口雜譚以當叢林驅賢養愚之可比
耳還委悉結解之意麼啼得血流無用處不如緘口
過殘春

開示

僧問弟子初入堂乞師開示師云那裡是你初入處
僧無語師云父母未生已前一念未舉已前是你初
處若是會得元初本體其來成佛舊矣問十二時中

支那

支那書籍叢書

三

那裏是學人安身立命處師云前山後山僧頓足云
在這裏師震威一喝僧亦喝師云你也喝我也喝還
是那個底是僧無語師乃云此問答故所繇興則扣
機語也所謂問在答處答在問處賓則始終賓主則
始終主有時賓主互換當面熱瞞所以石頭遷禪師
著辨魔揀異偈云明中有暗勿以暗相覩暗中有明
勿以明相遇明暗不相差祇如前後步據此以之爲
問答以之爲抑揚以之爲縱奪以之爲機鋒機不活
則見理未圓鋒不利則神悟未徹水乳相投箭鋒相
拄非偶然事也然此事定不是今日一個問頭明日

一個問頭徒弄口唇以資談柄必是工夫做到那極
則處轉不得身吐不得氣出一言發一問討個分曉
始適其志又有一等抱守靜工未得活潑將謂干了
百當以爲自得却發一問問雪峯古澗寒泉時如何
峯云瞪目不見底曰飲者如何峯云不從口入此僧
不悟更叅趙州州云既不從口入難道從鼻孔裏入
此僧一釣便上遂問古澗寒泉時如何州云苦曰飲
者如何州云死峯聞得乃曰趙州古佛遙望作禮峯
自此不答話師云此則公案評量者極多錯會者不
少都去勝負得失上較人長短不惟埋沒先聖亦且

辜負已靈殊不知南院曾禮雪峯爲古佛而雪峯今
禮趙州爲古佛亦是貧兒思舊債就中誦訛只爲雪
峯不答話處令人難得著眼檢點將來二老初答話
處一個是順水推舟一個是逆風把柁共相維持不
外于是衆中有具慚愧者向雪峯不答話處著得隻
眼日食斗金非分外其或未然時食粒米也難消

開示者個事相從者百不如信向者一二信向者百
不如徹證者一二徹證者百不如當此惡世行道者
一二然而行道者雖得一二及乎究竟諦當處鮮於
一個半個尚未及乎古人履歷近代且無上古叢林

上古師法上古機會吾儕入蜀經今十載雖叢林理
法不如上古風俗漸移稍通一線與人信與人行但
久近之不恒篤信此道非謬也大約自負本心立志
不善往往詐名頭云我是參禪者我是學道者把句
古人語蘊在胷中謂是本參話頭及至登門歷戶有
語無語盡逐落花流水拋擲腦後故終身而無究竟
者其病在心志之不善非禪道之不靈驗也若是一
定有話頭與人參有實法與人會則初祖不知擔幾
許話頭來今也愚見每對學人言遇境生疑逢緣理
會甚是捷當甚是至要胡不聞酒樓和尚聞客唱曲

一撰述

石山齋遺集卷四

四

云你便無心我也休忽然大悟遠公社十八高賢內
有一尊者棄妻出家夜夢與原妻行不淨行自揣彼
又不曾來我又不曾去因何而有此事致疑不待天
明忽然大豁然從上先德如此悟證難道定是參詰
頭做工夫得耶凡是遇境逢緣處卽是觸發忽一觸
發便是大疑有大疑必有大悟參禪者務要致疑爲
主疑乃悟之因不疑則不悟既是衆中信根稍具卽
此不可錯過珍重

開示個個眼橫鼻直人人鼻直眼橫若還取我求實
衣舊可憐一生佛祖方便固多要之不出兩種則禪
佛是也信得叅禪及立志叅禪信得念佛及立志念
佛雖頓漸之不同出生死心一也苟生死心破何容
眼上更添眉矢上更加尖勿勞久立

開示僧問如何是悟中迷師云錢串井繩進云如何
是迷中悟師云笊籬木杓僧禮拜師乃云錢串井繩
笊籬木杓迷悟兩關聖凡一著葛呈拄杖云莫是者
一著麼不遇春風花不開花開又被風吹落
開示風也大雨也大嚴寒施主請說法不說如何併
若何人人薦取脚跟下大衆且道脚跟下作麼生薦
取聾平地喫交石頭路滑

摘要

卷之四

三

開示學道貴乎明心見性則爲究竟處也然而初做工夫必須先發三種心一者信心信自心是佛故二者精進心遇境不退故三者遠大堅固心畢竟克果故如具此三心就素所信所疑或念佛或誦經念佛至一心不亂淨念相繼爲則也參誦有經義不明語關未透處是話頭是巴鼻不可終日因循卽行住坐臥茶裡飯裡無容間斷把作一件最要緊事做以恒心爲主不出一動一靜忽地裡觸發如貧得寶如暗得燈如饑得食始信佛祖不欺人不誑語也

開示這個事人人本具不可以男女相拘聖凡見隔

淨裸裸赤灑灑無可把渾無一物當情如過獨木橋相似一直向前不可左顧右盼若作一念萬念遂生不惟不到彼岸要且才一舉步尚生無限怯弱想然而佛祖種種法門不出頓漸兩途亦是當機信不信故若是信得及把得住漸亦頓也卽日用茶裡飯裡事物當情處一看看破是個甚麼道理不作道理會不作玄妙會如人飲水冷暖自知如此做去久久愈覺從前得力不得力自有一段光景向人吐露不得當此之際正是言論不足以辯文字不足以載惟證者方知

開示勿論久近叅方見人不見人只要識法者懼不在快口頭資談柄鬪百草機多一句爲勝上古雖有施設應病與藥總不是本分家作用若是個徹法源底在言句言句中痛快在棒喝棒喝中痛快本一活物何拘彼此爲我濟北老古錐見時人在言句不根其旨獨以棒喝接機無容湊泊如擊石火似閃電光當下要人瞥地遂起身拽杖歸方丈

破山禪師語錄卷第四

終

破山禪師語錄卷第五

明成都府嗣法門人通醉等編

廣錄

自我鼻祖一花五葉雙桂昌昌已來竟無餘花鬪麗
今夜明上座不忍杜口去也亦說兩句聊爲點景且
道是那兩句聲荷盡了無擎雨蓋菊殘猶有傲霜枝
僧問子啐母啄時如何師云哩囉哩囉僧禮拜師乃
云打起精神莫放寬一錐錐定只教穿若無疋馬單
刀力一月工夫又枉然問如何是疋馬單刀句師驀
面一掌便出歸方丈

師云山僧連日病倦不能依時及節爲衆打葛藤今因衆居士乞開示生死關頭一著子然者著子千聖共遊只爭迷悟迷則爲凡悟則成聖有何難易而可較哉昔龐居士捨了百萬家財學出世法一日對妻云難難十擔油麻樹上攤妻云易易百草頭上祖師意女靈照云也不難也不易飢來喫飯困來睡諸兄弟看此三人出手眼處如鼎之三足缺一不可渠謂百草頭祖師意非推之使易耶飢來飯困來眠非推之使難耶無非只在就裡一著上悟徹又如初祖觀得此土有大乘根器特特航海而來見梁武帝素所好佛教嘗對四衆講演獨談第一義諦以爲極則所以問如何是聖諦第一義磨云廓然無聖帝曰對朕者誰磨云不識帝不契吾祖自此折蘆渡江面壁少室後慧可大師立雪斷臂問及安心之旨謂之教外別傳直指人心見性成佛據可大師問某甲心未寧乞師安心祖曰將心來與汝安大師道覓心了不可得祖曰與汝安心竟何曾直指個心來耶六祖謂道個直早已曲了蓋證人人本具各各不無底一著子非有個別關頭別岐路使人分心取捨分心欣厭就是佛祖樹此多門到家是一而念佛念此心持呪護

此心叅禪悟此心看教辨此心此心此志非不悟非
不固爲因無始已來習氣薰染障蔽本明不得受用
故勞佛祖示一機一境一言一句要人當下冰釋生
死關頭不入輪迴六道受胎微形苦楚萬狀只得與
爾我做個通事舍人非是渠有不了之局以拄杖舉
起召大衆云只此一物喚作甚麼喚作拄杖則觸不
喚作拄杖則肯不可有言不可無語畢竟喚作甚麼
以拄杖擲地云依舊

師云打底不是坐叅底不是禪快活日子不過逐日
思想成顛所謂離心意識叅絕凡聖路學爾輩所叅

不能徹悟者卽冬瓜禪一味儼侗進堂將期一月東
聽西聽胡思亂想法法頭頭沒處著落這爾和身放
下又成黃楊木禪死墩墩地也山僧不忍坐視舉則
古人機緣與諸兄弟作個啞謎猜猜看昔鼓山赴閩
王請雪峯門送回曰一隻聖箭直射九重城裡去也
時太原孚上座云待某去勘過始得遂趣至中路問
師兄向甚麼處去山曰九重城裡孚曰忽遇三軍圍
繞時如何山曰他家自有通霄路孚曰恁麼則離宮
失殿去也山曰何處不稱尊孚拂袖便回舉似峯好
隻聖箭中路折却了也峯曰奴渠語在孚曰老凜儂

猶有鄉情在師召大眾云且道那裡是敲山折箭處試猜猜看猜得著到方丈裡通個消息

師云凡初做工夫切不可忙舉話頭念來念去念得疲勞厭倦便打退鼓謂是禪道佛法沒靈驗所以古人道休去歇去寒灰枯木去古廟香爐去一條白練去然後發大疑情此疑情者或是經教有所未明公案有所未透卽此不明不透處便是本叅話頭頓在面前微著眼覩忽地裡覩破素所疑所礙者則不倒斷而自倒斷矣曷足著著問人然爲初機說久經煅煉者未若不繇此還會麼不因樵子徑爭到葛洪家師落堂僧問大道只在目前要且目前難覩旣在目前爲甚麼難覩師舉起拄杖云是甚麼進云拄杖師云未夢見在進云和尚作麼生師云你眼瞎僧禮拜師乃云者件事如金屎法相似不會如金會者如屎所以當時有一僧問古德如何是佛德云我欲向汝道只恐汝不信僧云和尚誠言安敢不信德云卽汝便是其僧悟去如高峯大師在學地時盡平生伎倆一一搬弄話頭換了多少初淨寺掩關立死限學禪排昏濱散無不經驗過來只是胸中沒個灑落處後因夢寐之際忽然舉起萬法歸一一歸何處似有疑

撰述

研山齋白雲金翁

情結構偶於壁間見五祖演真贊曰百年三萬六千日反覆元來是者漢便有少分相應就去與人機鋒轉語被雪巖欽問著汝日間浩浩作得主麼曰作得主夢寐中作得主麼曰作得主正睡無夢時主人公在甚麼處峯無對欽曰我也不要你參禪不要你學道但只饑來喫飯困來打眠必要曉得者著子方休峯自此仍是五年一日被隣僧推枕子墮地忽然大悟方曉前非而今兄弟家豈不如古人耶斯時也有利者也有鈍者適才者一隊郎當漢齊來問話一個豎拳一個彈指似古人乎不似古人乎一個是冬瓜

直餽侗一個是瓠子曲彎彎雖道目前無法意在目前只如我與衆同處一堂同一眼見同一耳聞同一寂靜只是各人肚裏明白所謂如人飲水冷暖自知就是三世諸佛歷代祖師天下老和尚遙相出興千方百計無非只要各人曉得如法華經云若人曉了此諸佛世之師

師入堂默坐維那云有問話者麼師驀拈鐘槌云者個棒棒見血復良久衆無出師云打退不如駁退好遂舉祕魔禪師終日擎一木叉凡有衲子來參便一叉又住云道得也叉下死道不得也叉下死速道速

道如此數年罕有契其機者後一衲子先去將又藏過詣前作禮師拈叉不見其僧呵呵云原來見解只如此據我儂判斷秘魔老人原在者根叉上作活計幸者僧也善班門弄斧今我儂手中鐘槌亦是借底倘有討去時豈不是猢猻入布袋遂放下驕豎拳云還有者個不從人借若論者個人人本有各各不無只緣一向被生言熟語縛定不得自繇甚是恍惚欲做做他不上欲放放他不下寓喜被喜縛寓怒被怒縛寓哀被哀縛寓樂被樂縛寓聖被聖縛寓凡被凡縛寓生死被生死縛寓涅槃被涅槃縛總之聖解凡情一向認爲實法殊不知聖解凡情本一靈妙活鰻鰻地不見有生有死有凡有聖死逼逼地亦不見有生有死有凡有聖這點靈妙所在向汝諸人說來總是無用須是各人二六時中自去看破始得所謂從緣悟入永不退失我儂此說亦不可無何謂也有一向用心苦苦切切無計奈何者忽聞便覺安穩如人負擔上山到了十里二十里亦復不知還有多少里數忽遇一人向伊道好了祇有一里半里其人雖未到家便覺胸頭肩上輕了一輕我在學地時甚是快活甚是自在不料做了今世後人之師比做學者時

撰述

研山齋自註卷五

愈難願衆兄弟各各發大心奮大志盡此一期將胸中者點恍惚處冰消瓦解遍界光揚祖道得不慶快平生是則雖是還有一種疑處一發向汝諸人說破自古聖人悟道者甚多出世利生者間有幾人而已定不是必要開堂說法方爲了事豈不聞古人道松花若有霑春日根在深巖也著開然開堂說法一要福緣偶奏夙生願力不期然而然者永無他患我儂雖在者裡無奈一衆所推亦是牽強幾欲尋把茆蓋頭以作逸老完事蓋緣金粟老人之囑猶其不了只得在此鼓兩片皮遭人檢點欲棄衆則棄諸佛也雖

然一番絡索也是棒打石人頭曝曝論實事珍重衆作禮請開示時維那指一僧詣前禮一拜師驀頭一踏云爲汝諸人開示了也便出歸方丈

示僧參禪與念佛殺人併劫物善惡總繇之惟是一心做世人悟一心不入二岐路天堂尚偶然地獄豈悠固只因取捨中生起輪迴處喎試看山僧拄杖頭

本無迷也本無悟

師舉臨濟在黃檗處三度問佛法的的大意三度被打於中放不過處氣悶殺人指參大愚輕輕點破忽地掣拳揮掌誰當其鋒方是知痛癢漢若今兄弟家

撰述

碑山禪因錄卷五

被我棒頭打處不根其旨亂去卜度言知痛癢日在打處爲痛單看痛底是誰可憐生將我祖者根棒委曲如是若以此打處言知痛癢者古德有言未跨船舷早與三十棒了也未動腳跟早喫棒了也未開口前早與三十棒了也且道者個痛癢又作麼生知之難道也好去打處痛處云知痛癢耶所謂知痛癢者言識法者懼凡在言語上機境中識得根源處謂是知痛癢漢所以黃檗叅馬祖不料祖遷化旁叅百丈問曰馬大師生前有何言句示人丈舉自叅馬祖因緣與我一喝只得三日耳聾檗當下吐舌丈曰子莫

承嗣馬祖去檗云今日因師舉得見馬祖大機之用我若承嗣伊則喪我兒孫丈云智與師齊滅師半德智過於師方堪傳授兄弟你看者個榜樣還是從打處痛處叅究知痛癢耶不從打處痛處叅究知痛癢耶還是從喝處耳聾處知痛癢耶不從喝處耳聾處知痛癢耶試卜度看今日不禁口業分疏長短蓋緣我輩做禿居士者不識好惡錯會猶甚下底註脚耳還有一等不惟不達此意反生毀謗者想是輩難恠其愚豈不聞真銀不通世用真人難以應跡真言不無逆耳古德云我若一向舉揚宗乘中事法堂前草

深一丈良有以也

師云古人道三朝一七剋期取證你們在堂七日過矣曾取證也未一衆無語師云八十翁翁入場屋真誠不是小兒戲而今你輩不得自繇者其過有三一者自恃聰明法法頭頭一覽便會及至臨機目瞪口啞過在依他作解塞自悟門二者硬枯枯地盡力主張逢人便逞口頭滑以爲千了百當及至遇一智人面前却云不會過在見識不清意志恍惚三者領一話頭當座靠山相似總不信人長言短語只以自謂

不面人及至搬弄數十年來依然是個村夫俗子過在執著取勝易便信受如是種種說心說性說常說斷說道理自契說玄妙自證者盡是野狐精見解須向三千里外盡淨吐却方來東塔門下喫痛棒也師云言無展事句不投機承言者喪滯句者迷此是古人板齒生毛病爲今時分星撥兩下底註脚山僧曾恁麼分疏一上始得不承言不滯句活鱗鱗地如珠走盤更無留礙大衆且道還有商量也無衆無語師顧視云赤眼撞著火柴頭

師云敲定牙關捏定拳非思量處自蕭然諸人個裡

換通

石山藏書

九

合如是誰懼閻羅算飯錢大衆還有恁麼人麼如無有寒暑今促君壽有鬼神今妬君福復云個個腳跟點地驢前馬後人人鼻孔遼天馬後驢前堂中坐底心冷門外立底腿酸參

偶言

師寓金陵觀音庵有松谷禪者持聚雲吹萬小參謂從上古人單教明心見性便是的當次叱五家宗旨汚却古人面目爲自屎不覺臭又叱今時有據者妄行棒喝等事病僧披覽過不覺痛淚如雨孰料老胡絕望之日近矣嗚呼法本無弊蓋羊鹿牛馬之罷不一也固不得不饒舌以救將來害及不細誠非彼此人我之謂歟渠謂明心見性爲當試問心是何形性是何物或以心性是無則不應言飯是米做心性是有則法法頭頭不外於是如是則知米飯心法一也達一而不外五家者明矣又謂行棒行喝以至五位君臣者盡是窠臼是分別是取捨敢保渠未夢見也若夢見必不謂棒者拄杖子也如是古人不應曰先照後用先用後照照用同時照用不同時又云喚作拄杖子則觸不喚作拄杖子則背又云你有拄杖子與你拄杖子你無拄杖子奪你拄杖子又僧叅一老

宿入門便棒進云打豈慈悲耶憤然而去老宿云你作打會那其僧乃悟然古人縱奪非止一端有持木叉者有持竹篦者有持弓箭者有持刀劍者難道盡是六祖擊碓頭三下始當時擊碓頭乃杖非弓箭刀劍之種種渠謂是窠臼是分別是取捨則古人大機大用脫羅籠出窠臼虎驟龍驤星馳電激轉天關回地軸負衝天意氣用格外提持悉成剩語又謂拂者先儒譚經麈尾也如是馬祖不應召百丈云與我拿拂子來丈拿至遂舉起云卽此用離此用丈於是悟去儒之所用麈尾意有辨別然麈鹿在羣鹿中居尊

以尾東拂則羣鹿隨之於東以尾西拂則羣鹿隨之於西故儒者用表指揮羣徒亦繇是也然而儒家用祖家用尚隔天淵寧混同一意耶又謂喝者咄咄聲也如是古人不應有言我有時一喝如金剛王寶劍有時一喝如踞地師子有時一喝如探竿影草有時一喝不作一喝用又云一喝分賓主一喝分五教難道也是馬祖一喝之始當時百丈被喝則耳聾三日其餘一喝分賓主五教寶劍師子探竿者何耶又謂圓相者馬鳴所現日輪也如是古人不應變爲九十七種目爲圓相暗機義海字海意語默論種種不一

者難道也是馬祖送道欽書始當時只有馬鳴所現
日輪何得又有各樣差別者何耶如渠實未夢見自
是弄精魄漢何寃先代爲窠臼爲分別爲取捨悲夫
先代立意各從悟證處百計千方直指迷流圓契此
事不可執一而無餘執餘而無一所謂一有多種二
無兩般者是也渠意以一而不餘餘則爲窠臼爲分
別爲取捨正是一眼之龜值浮木孔千聖尚訶安用
病僧今日如是口業耶只因渠是獅子身中蟲反喫
師子身中肉恐去聖時遙中渠毒而上幸先聖下負
已靈不得不以是告

問荅機緣

石帆岳司馬問法鵬多少師豎一拳岳頓然赤色曰
我東南水窟地方人民老實莫在這裡惑亂人師云
貧道行脚十五年今日惑亂著一個岳曰惑亂我則
可只恐惑亂愚人師云阿誰是愚人岳瞪目視之曰
我也是路見不平見你年幼未是你做底時節師云
釋迦老子初出母胎指天指地難道也是年幼未是
時節麼岳曰所以雲門要一棒打殺我今日一棒打
殺你且作麼生師作怕勢云貧道性命幾乎喪在門
下岳躍然拜別

撰述

初刊元寶詩金鑑

士問道本無言因言顯道且道是言顯是默顯師驀頭一棒云是言是默士無語師連打兩棒士復來卓然而立師復打云且將你家茶飯問你百姓日用而不知不知個甚麼士擬開口師又打

僧問破山堂內有僧否師拈杖云向前來與汝道進云執杖者誰師驀頭一棒僧無語師連棒打出僧問不患人之不已知患不知人也如何是患不知人處師云你且知我是凡聖僧無語

僧問如何是一六開天師云竹密山齋冷進云如何是二五成性師云荷開水殿香

僧問達磨西來爲甚隻履西去師曰長安雖樂不是久居

僧問迷者迷醒者醒如何是獨脫一句師云八角磨盤空裡走進云不會師云不會別叅進云叅個甚麼師云八角磨盤空裡走

問如何是本來面目師以兩手掩面僧禮拜師便打僧問乞和尚開示師以手拭額云髮長僧像醜

僧問弟子不會做工夫乞和尚開示師合掌云善哉

善哉僧禮拜師便打

僧問如何是塵中能作主師云舌頭不出口進云如

何是化外自來賓師打云拄杖權爲答話人進云賓主相見事如何師連打兩棒

僧問生滅無常如何是常師云東塔又過東僧豎拳云在這裡師便打僧喝師又打進云不生不滅事如何師連打兩棒

僧問雙劒斬肩毛一槌番白面是甚麼人行履師云仔細着進云直入千峯內橫身荒草中師云脚下聲僧禮拜師啐一聲

問萬法從心生萬法從心滅不生不滅心在甚麼處
○謝三娘不識四字僧禮拜師曰虧汝當面懺悔

僧問如何是當機句師曰東塔廟前

士問山盡水窮如何是轉身處師曰布袋裏老鴉士禮拜師云還是會也拜不會也拜士擬測師喝出

問透網金鱗時如何師云到頭霜夜月任運落前溪
師問座主平日所習何業主云只解牧牛師云牛在甚麼處主云山中師云還我牛來主喝師云恁麼却犯人苗稼也主舌辯師叱云一等是個強牛

念佛僧乞開示師云念佛也落地獄不念也落地獄僧問登山涉水卽不問不涉程途一句作麼生道師云腳跟下好與三十棒進云學人有甚麼過師云甚

麼所在說有過無過僧喝師云猶嫌少在
僧問透出青山外目前渾是空空目相對時不墮日
空中是某甲疑處師云如何是汝不墮處進云正在
此疑師云疑則別參

僧問靈樹封盒子意如何師云且道裏許是甚麼進
云不封盒子意如何師云恁從滄海變終不與君通
僧問不可無心得不可有心求不可言語造不可寂
默通正恁麼時如何師云你在那裡得者消息來僧
擬測師驀頭一棒

僧問門裏出身易門外轉身難難易卽不問如何是
轉身句師云六月炎天冰似火進云不會師云冷熱
也不知進云知個甚麼師驀頭一棒

僧問和尚未生時如何師云冰糖出在福建進云已
生後如何師云地頭貨也不識

僧問不用卜度時如何師云千思百想進云卜度時
如何師云百想千思

僧問學人二六時中見色聞聲如風過樹時如何師
云蠟人向火

僧問世尊爲一切衆生開方便門設一大時教如何
向和尚者裡半字用不著師云你說底是甚麼

僧問還丹一粒點鐵成金至理一言轉凡成聖至理不言可成聖否師云你喚甚麼作至理僧轉身一帀師云掠虛漢

問此事如一個鐵丸子相似吞也吞不下吐也吐不出吞吐不出又作麼生師打云者是吞是吐僧無語僧問欲叅個中個何處用工夫師云蘇州有

僧問四大之中如何作主師作聽不清勢僧復舉前問師驁面一掌云你欠伶利

僧問學人終日喫飯不曾敵著一粒米時如何師云一個班鳩九隻鳥

僧問有苦有樂途路中事無苦無樂亦是途路中事如何是到家消息師驁口一拳僧禮拜師與一踏僧歸位師云適才苦樂到那裡去了僧一喝師休去

僧問臨濟叱三聖瞎驢是甚麼意師便掌僧亦掌師云我掌自有意你掌是甚麼意僧復掌師連掌打出門外云與你相打耶僧禮拜師驁頭一踏僧起擬開口師咄云何方瞎驢來者裡討草料喫

僧問如何是鼓山折箭處師便打僧禮拜師云見個甚麼道理進云不會師云棒頭有眼明如日僧問如何是學人本分事師云布袋裏老鴉進云不

會師云汝去叅取不會底來

問弟子姓萬未審父母未生前姓甚麼師云我向者
裏道不出士禮拜師云汝且道我答你也未士云不
會師云不會還姓萬

僧問盡大地是法身和尚在何處安身立命師云金
剛與泥人揩背僧禮拜師云見個甚麼

士問不是心不是佛不是物畢竟是個甚麼師云百
花叢裏過片葉不霑身士問訊師鳩面一掌士云痛
師復打兩掌士云痛痛師云稍知痛癢士禮拜師鳩

頭一踏

士問和尚是活佛如何拜死佛師鳩面一掌云且道
是死是活士佇思師云擬議思量白雲萬里

問本來無一法可得爲甚不合圓通師云只爲分明
極翻令所得遲進云過在甚麼處師云疑則別叅

朱婆子問一切時叅究念佛底是誰師云你這一問
從甚處來婆云朝夕不離師云不離個甚麼婆轉身

繞一帀云不離者個師云也是赤土塗牛奶

僧辭師云鐵蛇橫古路你向那裏去進云橫行豎去
師云則喪身失命了也僧遂不去

婆子問弟子現是女身父母未生前還是男是女師

撰者

石上和尚合金鑑

卓拄杖云還識者個麼婆云無去無來師云是甚麼所在說來說去云卽今如何抵敵師云好與三十棒問如何是佛祖向上事師云腳跟下薦取進云此是向下如何是向上事師云不顧脚跟三尺水只貪縱步上高峯

和石孫居士問那吒太子折骨還父割肉還母又爲父母說法未審如何說得師召居士士應諾師云會麼士佇思師云粘皮帶骨漢

士問金粟和尚送法衣與師是否師云是進云師可付與弟子得否師云得卽得只是要會衣線下事汝可會麼士云不會師云不得不得

士問如何方契本來人師云待烏石峯點頭卽向你道士云烏石峯點頭也請師道師云道卽不無你喚甚麼作烏石峯士無語

僧問和尚起期還是爲人爲已師云一個瓜子兩瓣殼進云沒滋味師云看者鈍根阿師

僧問喚作竹篦則觸不喚作竹笪則背畢竟喚作甚麼師罵口一拳云還作觸背得麼

僧問三世諸佛不知有狸奴白牯却知有未審有何差別師云飯袋子你知個甚麼進云不知師云不知

僧問有無卽不問如何是狗子佛性師劈面一掌云

是甚麼進云學人不會師云一掌一握血

行脚僧乞開示師舉起腳云會麼進云不會師云草鞋腳底疑無路拄杖前頭別有山

問世尊拈花迦葉微笑且道他笑個甚麼師云笑你不薦云薦後作麼生師云世尊不拈花迦葉不微笑僧問臘月三十到來乞和尚通個消息師云頭上漫漫脚下漫漫進云莫不踏空了也師啐一聲

僧問某甲作菜頭有一株不知根在何處師云知恩者少負恩者多

僧問一雨普潤未審還有潤不到處麼師云有云如何是潤不到處師云就是你者個焦芽敗種

僧問盡大地是沙門一隻眼師云看脚下進云意旨如何師云瞎

僧問作家相見事如何師連咳嗽兩聲進云猶未在師打云大好作家相見

僧問文殊乃七佛之師因甚作釋迦弟子師云一語下楊州

僧問如何是佛師云前三三進云如何是法師云後

[接述]

[卷之三]

三

三三僧休去師云分身兩處看
爾赤馮居士舉子湖狗子話乞開示師云仔細士頌
曰子湖隻狗恁鋏厲開口吞人莫迴避取却兩頭并
中間沒頭沒尾殊恠異咄莫恠異須仔細直饒驚出
汗渾身那時來喫棒頭意師對虛舟姚居士云馮居
士被子湖狗子敲一口了

月潭法主問還是悟有悟無師云放下有無來卽向
你道主作聽勢師云慣會裝聾害啞主云我是真龍
師云真龍何不上天去

僧參云有一事相借問得否師云只怕鼠口無象牙

僧擬測師驕拈拄杖僧以頭就之師云我偏不打你
僧云棒頭有眼師云且道眼在甚麼處僧豎起拳師
劈拳打云還有麼僧云撲破泥團子透出青山外師
徵云如何是你透底道理僧擬議師驕頭一棒

師不安維那問云和尚尊候如何師云七七八八那
云七七八八還是好耶不好耶師云一任你卜度
僧問佛耶祖耶據此證此且道證個甚麼師打云會
麼僧佇思師連棒打出

僧問佛未出世祖未西來未審者個在甚麼處師拈
拄杖歸方丈

撰述

布山房詩集

三

師避秦石柱司偶部院東川呂居士致請書云時無禪機不孝畧有禪心咫尺崇光瞻挹心切便擬單騎榻前一瀉夙心山深道棘思滋地方之驛騷也不棄愚忱惠然一賁可勝懸企爲禱師拽杖而赴士出欲作禮師云你是呂居士麼士曰不敢師云父母未生前還姓甚麼士擬開口師便打士怒色師復打士趨進師呵呵大笑云將謂將謂原來原來遂占一偈無端平地起孤堆駭得虛空顛倒走痛打金毛人不識幾乎翻作跳牆狗士怒出掩門大張威令相勘師又占一偈父母未生前句子等閒棒著發無明猛然省得非他物十八女兒不繫裙遂歸司主馬嵩山以扭綆拒師又復占一偈拄杖芒鞋荆棘路沾沾帶滯無回互通身泥水尚未乾又穿一雙鐵脚褲土再請焚香始拜爲弟子師曰五年未剖荆山玉忽得渠來秘不住挂杖麻繩密通雷門布鼓明明露泥猪癩狗打驚悖跛鰲盲龜生恐怖獻與楚王人不識只當一個大蘿蔔

師與元陽張道士話及病中有不死的師徵云不死的在甚麼處士云遠在咫尺近則千里師休去僧問黑白未分時如何師云禮拜甚麼僧擬問師叱

云兩重公案又問進前逢短岸退後值深坑如何是轉身處師拈杖直打出

僧問若能轉物卽同如來學人轉物同個甚麼師驀頭一棒僧喝師連棒打出
問一口吸盡西江水時如何師云近前來僧佇思師云立地死漢進云相隨來也師云甚麼物恁麼來僧無語師連棒打出

破山禪師語錄卷第五

終

破山明禪師語錄卷第六

明成都府嗣法門人通醉等編

法語

象崖西堂

金風遍野之時萬木凋零之際象崖長老索法語歸閨掩關時破道人以虛空爲關行住坐臥也在裏許著衣喫飯也在裏許屙屎放尿也在裏許迎賓待客也在裏許只到千日事畢猢猻伎倆鬼家活計都盧拋向威音那邊又那邊方買草鞋尋山問水也

破浪禪人

學道人志須堅心須固不被境風所動以一念萬年
萬年一念任是魔來佛來逆來順來亦直就中分曉
當下便是自此捨一具骨負春汲水三十年二十年
肩頭脚底苦趼重生方到破山門下喫棒有分

琢璞主人

者個事須真參實悟法法頭頭無一絲毫不從本地
風光上廓徹安作人中之龍象也故以琢璞號之非
石中無玉玉之不琢而成器焉成器則知龍象玉石
不相異耳

清白禪人

叅學漢須了辨不可沉吟將且昇剔起眉毛著力看
看渠定不隨方便渠是誰兮直恁麼有時位坐空王
殿 又

細細山頭雨飄飄不見踪有時風送樹和葉落庭中
山中不得閒共隨雲雨住草鞋腳底忙踏破青苔路
百城禪人

住山行腳本不爲別事只緣生死關頭一著子每於
捕風捉影邊偷安取適處忽地裏覷破原來和尚是
人做底

梵埜行者

撰述

石鼎齋詩集卷之六

橫寫豎寫無一個元字脚寫得著長篇短篇無一言盡這張紙只有這寫說不到處是個甚麼咄也是烏龜向火

翠融禪人

腳跟下七縱八橫頂門上兩頭三處無非只要個中分析得來頭頭皆我捨身命處也且道融禪人曾恁的一回也未若然草鞋踏破穩坐長安其未如是舍元殿裡切莫迷頭認影

荆獻羅居士

居士參禪貴圖契悟佛祖機關徹透今時露布與衲

僧家同長連牀上行住坐臥了此餘生畢竟巴鼻處請著眼看是個甚麼叅

紹儀何居士

做工夫如急水灘頭撐篙相似撐得一篙退却十篙拚命捨死擰去擰得無可用力處撥轉船頭處處皆岸也

獻南張居士

終日向文不加點處卒難下手一畫未有時真宗默契始於無說無形之際則河馬負圖洛龜呈書稍露一著子也呵呵

招述

不二刀自言卷之六

徧拙禪人

樹下墳間一食一宿味盡甜辛酸苦到處播弄唇皮
與佛祖据拾餘機是我法門中龍象事也

恒範禪人

禪和子樹精進幢披忍辱鎧無論凡之與聖智之與愚勞之與勤生之與死單單貴稟此心此志將這些子恍惚處要明白究竟決了終身之志豈如做個潔白漢子浩浩來天地間辜人負已虛生浪死者如此則銅枷鐵鎖鋒刀劍戟無時不在無時不臨欲逃無地欲竄無門正所謂毫釐繫念三塗業因贊爾情生

萬劫羈鎖

叅白禪人

禪和子志於行脚涉水登山瞻風撥草飲冰茶喫餽飯棲雲堂臥霜榻受種種苦心只爲各人衣線下一點恍惚處然者點恍惚欲從自決則頭上安頭欲從人決則斬頭覓活如是二邊互起互倒渾無決者故曰恍惚所以爲山間仰山云子之所得還是自性得從人得仰云雖是自性宗通亦假稟受師承吾觀二老酬酢良有深意定不是從自己乾爆爆地不假他人亦不是向他入水漉漉地不假自己針芥相投水

乳相合卒啄同時師資緣契的非一日而器之者耶
偶一僧問和尚眉毛還在麼復掌云吾因病筆葛藤
雖覺許多爾更躡躅漆桶子依然不快

隱輝侍者

佛祖以心印心之法無論智之與愚凡之與聖僧之
與俗男之與女貴在知有個事畢竟不從人得雖是
猛著精彩壁立萬仞契取不疑之處方買草鞋遍叅
知識遭人唾罵也

古淑沈居士

山有奇峯峯有奇松松濤日吼音穿洞口古淑坐中

悟耳圓通手持拄杖經行沿上看白鷺鷥疑是雪飛
以杖逐魚渾忘我殊疑此信此非人不爾夢之覺之
吾何汝師

佛掌侯居士

人迷生死不識生死之苦若鳥不識空魚不識水然
猛出是者卽在當念觸一事犯一法生一計便是好
消息好時節好意思人多於此忽畧於此蹉過於此
自棄如鳥空魚水不相別也是以病僧見是葷痛與
棒熱與喝佛與掌令人頓出生死窠臼不留一元字
脚教人招萬劫繫驢之概

三品
撰述

石泉藏書

問津禪人

行脚衲子肩擔日月踏遍雲山入一門到一處問一機轉一語看人動靜識人好惡放下蒲團拗折拄杖三十年二十年如王氣宇口吞乾坤方去孤峯頂上盤結草菴訶佛罵祖

淑雲禪人

子曾向三峯鐫背關頭橫行直撞挨拶些子氣宇吐向福城棒頭喝下意欲千了百當臨行索病叟草鞋錢而合掌受之三拜待渠徧禮諸方再來痛與瞎光兒一頓好罵勉旃

百拙禪人

禪和子擔囊負鉢入一叢林進一保社只以此事爲懷更無別般伎倆方是人中之龍獸中之師也故以龍象稱之豈比羣獸中無獅象師象中無羣獸矣然而師獸之不同形威爪牙一也只此一處同則知佛祖大機大用通身是遍身是豈虛語哉

景山趙居士

參禪念佛二門究竟生死爲極了知生死別無禪參別無佛念有佛念則是生死中佛有禪參則是生死中禪於是二中間未夢生死在還知麼生從何來死

撰述

研山禪室詩錄

從何去參

萍止禪人

歇狂子叅多方行脚眼高四海氣壓十方與佛祖結死生冤家值人天開邪正耳目惟萍止禪人在破山門下拄杖頭邊薦取誰縛汝三字則一生叅學事畢矣

默融禪人

禪和子爲生死行脚切忌石頭路滑轉盼則蹉過脚跟直前則撞斷眉目如是行脚畢竟作麼生看脚下

應如禪人

叅禪打坐透露鼻祖家風勿論僧俗男女都盧將生

死二字貼在額頭上行也如是叅坐也如是叅來叅去叅到心識不行言思路絕處把生死二字向那早晨淨面時一摸摸掉永不疑生疑死疑聖疑凡橫身天外舉步大方奮獅子威潛行密運鼓老凥舌開導羣迷庶不枉他多方行脚踏遍雲山處處欠草鞋帳

聞修禪人

割愛辭親負冲天意氣把生死二字貼在額頭上行也如是叅坐也如是叅來叅去叅到心識不行處如槁木寒灰直有一念怖生死之心靈靈蠢蠢欲了未了恍恍惚惚當斷不斷凝然似有物礙此是聖解

[撰述]

[研山齋詩集卷之六]

丈雪禪人

辭親割愛浪跡江湖披一絲掛一絡赤條條地眼空
諸方將謂有幾個面目露遠天鼻孔及至行腳遍來
親見佛恩仍是痛罵痛打連者一點氣息尚容不得
雲飄雪笠霜飯水茶復吞復吐只令冷心腸一付賣
弄與人猪嫌狗不欲始到佛恩門下叫屈抱贓

蒼松禪人

幾過忠南釣竿幾折波澄月朗金鱗始現忽地別吾
儕索數語歸山媿吾窮肚皮無滴墨水痛與一絡索
書之以及將來泥佛土佛互相勸發向有佛處不可

住無佛處急走過誅把茆蓋頭待神差鬼使走出來
與佛祖爭口氣也

法空上人

雞足山下帶一粒粟散遍大千亦能殺人亦能活人
當暴日而愈毒著疎雨而愈芳德澤恩輝付千鍾而
無盡忠肝義胆盈萬斛而有餘語大而大也盡涯涘
而莫見乎邊表語繩而細也空微密而莫審乎中字
變生作熟杜饑人之飽參點石成金稅窮子之價直
其夢感也惟豎一指復其問也鳩築一拳孰能疑之
子能參之則不負大迦葉發一微笑偈曰簷前密布

撰述

石山禪師詩集卷六

凡情縛脫兩橛之所使然也就中急討巴鼻始有少
分相應卜度長短則雲月是同溪山各異耳

寇門蔡夫人

參禪本要了生死生死了時却放參欲了須知下手
處揚眉瞬目剎那間不隨喜怒哀樂轉不被貪瞋癡
愛瞞不著聖凡情見解不忘行住坐臥看眼耳鼻舌
身意識六門六賊緊牢關卽此便是真精進卽此便
是脫危安如是了知法界性水是水兮山是山

唯心禪人

法法頭頭不離當處舉念卽覺便是放身捨命之時

節也而人不悟強去節外生枝數番顛倒極至臨頭
一場無益蓋是自生分別非怨聖賢有所未說耶如
我所說名正說不如說者卽邪外可知也勉之

圓融禪人

踏荆棘破風塵畢竟以生死爲極若或不爾縱是一

副鐵心肝只恐三日風四日雨終不免是要生锈也

離指禪人

法道秋晚祖風正替望爾輩如急水灘頭撐篙只得
拚命著力安云住山取適偷安爲志臨行欲吾儕惠
草鞋錢只得信筆記個帳在壁上候異日共爾打算

接述

卷一百一十五

六

蜘蛛網搭下高堆曲蟮泥碧眼胡僧不識字將來讀
作一聯詩

繡石禪人

打口鼓子說禪說道都是我衲僧家習氣未是本分
作家若是本分作家如愚如訥隱隱地自是不同又
不可不識一丁粧作如是愈加不本分所謂本色住
山人亦無刀斧痕

靡石禪人

禪和子有志行腳痛以生死爲念到一知識處或發
一問或請益體取話頭來歷忽然會得此個話頭或

叅生從何來死從何去明得生處死處亦然那時節
因地一聲始信茶條拄杖新行脚葛葉蒲團舊話頭
禪源禪人

出家志在叅學叅而不透必學學而不圓必叅此兩
者亦不可偏廢若獨學而不叅祇益見聞若獨叅而
不學愈益我慢正在不偏廢處頭頭要了法法要明
則不負出家之志也

雪瀾法孫

叅禪打坐是我衲僧家分內事也詎假以文章學問
巧妙尖新說鐸鐸句弄套套語以資談柄揚眉瞬目

一撮述

藏山和尚錄卷之六

以當機鋒真獅子兒只要喫人然喫人者正是直截根源不同逐塊近來多見禪流初不務此先去學滿一肚皮然後叅禪殊不知禪何所取意也本要離名字相離心緣相離四句絕百非豈是隨邪逐惡不根其盲妄將魚目作明珠磁石爲至寶到處去逞驢唇馬嘴棒風喝雲以爲極則老僧此個葛藤爲點禪病倘禪若無病何用叅爲

寒皋書記

流離苦世將謂老僧殘羹餽飯盡傾無剩壹料忍饑廝涓輩東尋西覓災木出吾醜也則老僧又悲又喜

幸愚徒雪公收爲弟子刊老僧全錄善書筆手點畫頗精莫可贊嘆然布施一金又不如布施一言以佳其志俟異日相撞時奉三十棒且道是賞伊罰伊

佛冤法孫

做個禪和子最要苦得喫不得然後可談就中事若是只圖粉飾個模樣內不相應乃形同沙門未得法同沙門也然苦非是以擔山填海勞其筋骨餓其體膚不過是二六時中此生死之心未覲破終是爲礙如何是怖生死的心叅

心瞿禪者

撰述

高僧傳

入一叢林進一保社聽人處分究竟自不知肩頭脚
底早已不唧溜肯從自己分中體取肩頭上輕重脚
底下高低撞著磕著處會得此事不在別處

石雲禪者

雪笠雲瓢逍遙物外與世不相侔正好將生死二字
時刻註在念頭上朝也如是暮也如是忽地裡覬破
始知生死二字方決疑也

示耀泉丁居士

者事如雲長刀非大力者安能荷之耀泉居士身雖
在家而稟是刀不怕不勝生死魔軍勦絕聖凡窠臼

茶話

師寓金陵閱藏庵曰茶話之說盡是時人權設的非
歷祖有此謂也非但病僧恪慈自我天童老和尚每
嘗亦向人天衆前諄諄道過所謂說法尚有儀式或
五時示衆縱奪抑揚匪可相混不無拈舉各人本具
一大事因緣耳今夜永覺上座設茶欲病僧茶話也
是將蝦鈎鱉所言人人已躬下一段大事是我先佛
說起與我輩做個通事舍人亦大家瞌睡相似畢竟
有個先醒然先醒者非獨自醒逐個教之令醒經云
舍利弗當知我本立誓願欲令一切衆如我等無異

極容易事而翻爲難不得不從難處做去然有形假事則易做唯此事沒撈摸沒巴鼻欲下手則無處下手欲用心則無心可用到此則唯證乃知不爾疑生疑死疑佛疑祖這些恍惚處實爲命根不斷還委悉麼不愁効戰如星下唯恐藕絲絆殺人

茶話師云東塔堂內喫茶人人心亂如麻山僧拄杖一擲驚起井底蝦蟆以拄杖擲地喝一喝

茶話淨頭今夜設茶大似井底推車會得如麻似粟不會似粟如麻未審衆中有會得者麼時有僧出來一喝師云再喝一喝看僧無語師云莫道明上座

向人天衆前撒土撒沙

茶話小盡二十九大盡有三十内外諸禪和齊來討巴鼻一條短杖藜打得血滴滴喝一喝云天衆謝茶話雲門餅趙州茶一番施設一番嘉有人就裏能如是喫著通身是爪牙未審衆中還有恁麼人麼試出來吞吐看如無待山僧自吞吐去也一杯兩杯不濟渴七個八個却知飽

茶話諸方此夜極驕奢惟我蟠龍善作家燒上一鍋滾白水達人三盞燭煙茶

茶話施主設茶請法山僧微笑不答各人肚裏明白

[撰述]

[卷之六]

何用之乎者也所以道是法不可示言詞相寂滅無
言爲至言無說乃真說若然不說不妨熾然而說有
塵說刹說熾然說無間歇天地從此位萬物從此育
會得途中受用不會世諦流布顧視左右云若向此
中會得管教生死心息

茶話喫茶終日說茶話惟有今朝話喫茶敲著趙州
這底句筋頭碗底發漚花

茶話設茶檀越到祥符爲我兩堂雲水徒喫得飽餐
無剩物歸單依舊嘴盧都

破山禪師語錄卷第六

終



60

1

2

3

4

5

6

7

8

9

70

1

2

3

4

5

6

7

8

9

四
一
十

